

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Siunnersuut manna saqqummiunneqarpoq, ilinniagaqassutsip nalinginnaasumik qaffassarniarnerani suliniutit ilaattut, aamma Kalaallit Nunaanni folkehøjskolit ilinniartitsinikkut suliniuteqarnermut peqataalersinnerisigut ilinniagaqarnissamut piukkunnarsarnissamullu periarfissatut neqeroorutit tamatigoornerusut annertunerusullu pilersikkumallugit.

Tassunga atatillugu siunnersuutip siunertaraa Kalaallit Nunaanni ilinniarfiit pisinnaasaannik atuinerup annertusarnissaa, Kalaallit Nunaanni folkehøjskolit atorluarnerunerisigut, aammattaaq folkehøjskolit namminneq oqariartuutiginikuaat inuiaqatigiinni piginnaasaqassuseq annertusarlugu nalinginnaasumik suliniutinut peqataarusullutik.

Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup tamatumunnga atatillugu Knud Rasmussenip Højskolia aamma Sulisartut Højskolia oqalliseqatiginikuuai inatsisiliornermi atuuttumi periarfissaasut aallaavigalugit. Folkehøjskolit pillugit Inatsisartut peqqussutaata nr. 9, 21. maj 2002-meersup akuersissutiginerani erseqqissarneqarpoq, folkehøjskolit atorluarneruneqartariaqartut ilinniartitsinerit pikkorissaanerillu pisinnaatitsilerfiusut annertunerusumik neqeroorutigisarnissaannut naleqqiullugu.

Inatsisartut 2002-mi upernaakkut ataatsimiinneranni siunnersuut oqallisigineqarmat ilaatigut oqaatigineqarpoq, folkehøjskolit maannarnit annertunerusumik piareersaataasumik atuartitsinerup atorineqassasut, taamaaliornikkut ilinniartut ilinniagaqalernissaminnut ilinniaqqinnissaminnulluunniit piareersimaneroqqullugit. Tamatuma saniatigut oqaatigineqarpoq, ilinniarfiit aammattaaq qularnaassagaat, inuusuttut ilinniarumasut ilinniagavitsik aallartitsinnagu ilisimasaqalernissaasa pitsaanerusumik periarfissinneqarnissaat.

Kiisalu oqaatigineqarpoq, Inatsisartut peqqussutaata tunngavississagaa immikkut pisoqartillugu folkehøjskolit pisinnaatitsilerfiusunik ilinniartitsinnaanissaat, tamatumani pineqarluni ilinniartitsineq pisinnaatitsilerfiusoq, ilinniartunit assersuutigalugu allanik ilinniaqqinnermut suliffeqalernermulluunniit naleqqiullugu atorineqarsinnaasoq.

Kisianni pisinnaatitsilerfiusumik ilinniartitsinerup qaffasissutsimigut meeqqat atuarfianni inaarutaasumik misilitsinnerup nalinga qaangersinnaanngilaa. Inatsisartut peqqussutaannut maanna atuuttumut oqaaseqaatini aammattaaq ersippoq, peqqussutit tunngavigigaa folkehøjskolit pillugit Inatsisartut peqqussutaat nr. 1, 16. oktober 1980-imeersoq, 2002-milu nutaartaasut annermik folkehøjskolit aningaasaqarnerannut tunngasuusut.

Aammattaaq paasinarsivoq malittarisassat atuuttut naammaginatsumik annertussusilimmik ilinniartitsinikkut nalinginnaasumik suliniutinut tapertanissaq siunertaralugu atorineqarsimanngitsut, pisinnaatitsilerfiusumik ilinniartitsinissamik inatsisitigut periarfissaareersup atorneratigut, tamatumunngalu annermik peqqutaasinnaavoq, pisinnaatitsilerfiusumik ilinniartitsinerup qaffasissuseq aalajangersimasoq qaangertussaannimmagu. Aammattaaq Inatsisartut peqqussutaanni atuuttumi killiliinnermut tamatumunnga peqqutaavoq danskit pisinnaatitsilerlutik inatsisaanni, tassalu Kalaallit

Nunaanni folkehøjskolit pillugit inatsimmi nr. 609, 23. december 1980-imeersumi, assingusumik killiliisoqarmat. Danskit inatsisaat pineqartoq Namminersoneq pillugu inatsisip atuutilerneratigut atorunnaarsinneqarpoq, taamaammallu killiliinerit pineqartut maanna peerneqarsinnaalerput.

Taamaammat malittarisassat maanna atuuttut killeqartitsineri akuerlugit siunnersuutigineqarpoq, folkehøjskolit pisinnaatitsilerfiuvissunik ilinniartitsinissamik periarfissaat erseqqissarneqarlutillu annertusineqassasut, killiliissutaasut maanna atuuttut peerlugit. Tassunga ilanngullugu siunnersuutigineqarpoq, folkehøjskolit tapertaasinnaassasut, pisinnaasanik inerisaanernik ilinniartitsinernillu pisariaqartitsinerit maanna sinaakkusiunneqartut iluanni matussuserneqarsinnaanngikkaangata, tamatumani pineqarluni inuutissarsiutinik ilinniartitsinermik aamma ilinniarnertuunngorniarfinni atuartitsissutaasartunik neqeroorsinnaanissamut periarfissiinissaq.

Taamaammat siunnersuutip siunertaraa folkehøjskolit inatsisitigut tunngaviisa naammaginantumik eqaassuseqalersinnissaat, tassuunakkut folkehøjskolit nalinginnaasumik ilinniartitsinikkut suliniutinut annertunerusumik peqataasinnaanngoqqullugit, tassuunakkullu folkehøjskolit ingerlatsinerannut ilisarnaataasoq iluaqutigalugu, tassalu najugaqarfiutigalugu ilinniartittut avatangiiseqarluni ingerlatsineq, ilinniartitsinerup saniatigut ilinniartuunnaanngitsut aammali ilinniartut ilinniartitsisullu akornanni ataatsimoorfiusoq.

Tamatumani folkehøjskolit ilinniartitsinerminni avatangiiserisaat inuusuttunut ilinniakkamik pisinaalersitsiffiusumik ilinniagaqalersimangitsunut, nalinginnaasumillu ilinniarnerminni avatangiiseqarlutik ingerlaanaq ilinnialernissaminnik ilimanaateqarpallaanngitsunut kajuminnartuussapput. Tamatumunnga atatillugu naalakkersuisooqatigiit isumaqatigiissutaanni ilinniartitsinermut immikkoortumi ersippoq, "kinaluunniit ilinniagaqarusuttoq "matunik matoqqasunik" imaluunniit ingerlaqqeriarsinnaajunnaartitaanernik aporfeqassanngilaq. Ilinniarneq pisinnaatitaaffiuvoq, kikkulluunniit periarfissarisaaat."

Ilutigisaanik erseqqissarneqassaaq, siunnersuutip siunertarinngimmagu, folkehøjskolit maanna neqeroorutigisagaasa, tassalu folkehøjskolernerit nalinginnaasut ilinniartitsissutaasartunik nalinginnaasunik peroriartuutaasunik imaqartut aamma kulturimut, kinaassutsimut inuttullu ineriartornermut sammisut, taamaalillutillu pisinnaalersitsiffiunngitsut, allanngortinnissaat, tassami pingaartuummat folkehøjskolit nalinginnaasumik peroriartuutaasinnaasunik ingerlatsinerisa attatiinnarnissaat. Taamaalilluni siunnersuummi pisinnaalersitsiffiusunik ilinniartitsinermik neqeroorsinnaalernissamut periarfissiineq, folkehøjskolit nalinginnaasumik peroriartuutaasumik pingaarnertut ingerlatsinerannut tapertaaginnarpoq.

2. Inatsisissatut siunnersuummi pingaarnertit

a) Inatsisit atuuttut

Immikkoortoq 1-ip ataani eqqaaneqartut inatsit atuuttoq tassaavoq Folkehøjskolit pillugit Inatsisartut peqqussutaat nr. 9, 21. maj 2002-meersoq. Tassani ersippoq folkehøjskolit ingerlatsinerat pingaarnerusutigut tassaasoq inersimasunik nalinginnaasumik ilikkagassanik atuartitsineq. Aammattaq peqqussutip atuuttup siunertaanut oqaaseqaatini ersippoq, nalinginnaasumik ilinniartitsinerup pineqartup illuatungerigaa immikkuullarissumik pisinnaalersitsiffiusumik ilinniartitsineq.

Saniatigut Inatsisartut peqqussutaanni ersippoq, folkehøjskolit pissutsit immikkut ittut atuutsillugit "pisinnaatitaaffimmik pissarsiffiusumik" atuartitsineq neqeroorutigisinnaagaat, malittarisassat Naalakkersuisunit aalajangersarneqartut naapertorlugit.

Tassunga atatillugu taaneqanngilaq pissutsit immikkut ittut suut, folkehøjskolit pisinnaatitsilerfiusumik ilinniartitsisinnaalernissaat pillugu malittarisassaliornissamut toqqammaviussanersut. Tassunga ilanngullugu eqqaaneqarpoq "pisinnaatitaaffeqalersitsisumik ilinniartitsineq" aamma "pisinnaatitsilerfiusumik ilinniartitsineq" assigiinngissuteqanngitsut.

Kisianni aamma ersippoq, pisinnaatitsineq atuuttoq nalinginnaasumik peroriartuutaasumik atuartitsinermut killeqartoq, imaappoq meeqqat atuarfianni inaarutaasumik misilitsinneq pineqartoq. Kiisalu Inatsisartut peqqussutaat atuuttoq aalajangersagaqarpoq, Naalakkersuisut pisinnaatinneqarlutik pisariaqartitsineq naapertorlugu peqqussummi aalajangersakkanik sanioqqutitsinissaminut, peqqussutip atuuffiata iluani misileraanissaq siuarsarumallugu. Tamannalu peqqussutip siunertaanik aalajangersakkanut sanilliuttariaqarpoq.

Qulaani taaneqartutut siunertaani aalajangersakkami ersippoq folkehøjskolit ingerlassaat nalinginnaasumik peroriartuutaassasut, tamatumalu illuatungeraa immikkut pisinaatitsiffiulersumik ilinniartitsineq. Tamanna tunuliaqutaralugu nalilerneqarpoq, Inatsisartut peqqussutaanni atuuttumi misileraasinnaanermut aalajangersagaq naapertorlugu pisinnaatitsiffiulersumik ilinniartitsinerit eqqarsaatigineqartut aallartinnissaat ajornassasoq.

Taamaammatt eqikkaasumik tunngaviusutut oqaatigisariaqarpoq, folkehøjskolit inatsisit atuuttut tunngavigalugit, meeqqat atuarfianni inaarutaasumik misilitsinnerit saniatigut ilinniakkanik pisinnaatitsilerfiusunik neqerooruteqarsinnaanngitsut. Aammattaaq eqqaaneqarsinnaavoq assersuutigalugu ullumikkut ilinniartunut inissiani initaarneq ajornanngimmat ilinniarnertuunngorniarfinni atuartitsissutinik ataasiakkaanik ilinniarneq tunngavigalugu.

b) Siunnersuut

Siunnersuutip pingaarnertut siunertaraa qularnaassallugu folkehøjskolit nalinginnaasumik peroriartuutaasunik, ilinniakkatut allatut aaqqissuussaanngikkaluanik pisinnaatitsilerfiunngitsunillu aamma ilinniakkanik pisinnaatitsilerfiusunik neqerooruteqarsinnaanissaat.

Ilinniartitsinerinik pisinnaatitsilerfiusunik neqeroorsinnaanermut periarfissanut siunnersuutigineqartunut tunngatillugu oqaatigineqassaaq, pisinnaatitsilerfiusumik ilinniartitsinerit marluk siunnersuummi pineqarmata. Siulleg tassaaq pisinnaatitsilerfiusumik ilinniartitsineq mernguarnartulerinermut aamma pilersitsiffiusumik ilinniartitsinermut tunngasoq, aappaalu tassaalluni ilinniartitsineq ilinniarfinit allanit Piareersarfinnillu neqeroorutigineqartareersoq.

Taamaalilluni periarfissap aappaanut ilaapput ilinniartitsinerit misilitsinnissamut piareersarfiusut, malittarisassat atuuttut naapertorlugit meeqqat atuarfianni inaarutaasumik naliliinerit ilaannut, ilinnialissutaasinnaasumik ilinniarnarit allat, inuutissarsiutinik tunngaviusumik ilinniakkat aamma atuartitsissutinik ataasiakkaanik ilinniarnertuunngorniarfinni ingerlanneqartunik ilinniarnissamik siunertaqartut.

Inatsisissatut siunnersuutip qularnaassavaa ilinniarfiit pioreersut folkehøjskolinik suleqateqarsinnaanerat, ilinniartitsinermik pisinnaasanillu inerisaanermik annertunerusumik pisariaqartitsisoqalersillugu, tamannalu sinaakkutaasut pioreersut iluini matussuserneqarsinnaatinnagu. Taamaammat siunnersuut pingaarnerusutigut tassaavoq siunertatut aalajangersakkanik annertusaaneq.

Taamaammat siunnersuutip tunngavissippaa Piareersarfinni, tunngaviusumik inuutissarsiutinik ilinniartitsinermi ilinniarnertuunngorniarfinnilu ilinniagaasartut neqeroorutigineqarsinnaanerat, pisariaqartitsineq ilinniarfiit nalinginnaasumik tamakkunanga ingerlatsisut matussusersinnaangikkaangassuk.

Taamaattoq taamatut ilinniartitsinikkut suliniutit amerlanertigut piumasaqaatitarissavaat, ilinniarfiit ilinniakkanik nalinginnaasumik ingerlatsisuusut isumaqatigiissuteqarfigineqarnerat. Siunnersuutip pisinnaatitsilerfiusunik ilinniartitsinissamut periarfissiinera atorneqassappat, piumasaqaataassaaq ilinniartitsinerup ilinniakkami pineqartumi malittarisassat maleruassagai.

Siunnersuutip aammattaaq ammaappaa, folkehøjskolit ilinnialernissamut piareersaataasunik aallartitsisinnaanerat, ilinniartut immikkut ittutigut ilisimasaasa pisinnaasaasalu pitsanngorsarnissaat siunertaralugu, ilinniarfiit nalinginnaasut tamatigoornerusumik ilinniartitsisariaqarfianni.

Imaappoq folkehøjskolit ilinniakkat ilinniagassatut imarisaasa ilaat neqeroorutigisinnaagaat, ilinnialernissamut ilisarititsinertut ingerlatsiutigalutik. Aammattaaq siunnersuutip periarfissippaa, folkehøjskolit ilinniartitsinermik, ilinniartut ilinnialernissamut piumasaqaataasunik aalajangersimasunik angusaqarnissaannut piareersaataasunik ingerlatsisinnaanerat.

Kiisalu siunertarineqarpoq meeqqat atuarfianni atuartitsissutaasartunik inaarutaasumik naliliinermut peqataanissamut periarfissaareersut ullumernit annertunerusumik atorneqassasut. Tamatumani aallaaviussaaq ilinniartut folkehøjskolip ilinniartitsinermut atortunik ilinniarnermilu immikkut avatangiiseqartitsisinnaaneramik atorluanerisigut, tassami folkehøjskolit toqqissisimanartunik sinaakkuteqarluni ingerlaavartumik tapersersuinissamut, siunnersuinissamut ilitsersuinissamullu periarfissarissaarput.

Tamanna isiginiarneqassaaq assingusumik piukkunnarsarnernut kommunini Piareersarfinni ingerlanneqartunut tapertatut. Taamatut piukkunnarsarnerit annermik saaffiginnissapput inunnt assersuutigalugu inuutissarsiutinik ilinniarfimmi ilinniarnertuunngorniarfimmiluunniit ilinniagaqalernissamut naammangitsumik pisinnaasalinnut, folkehøjskolilli ilinniartut qanitaralugit ilinniartitsinermi avatangiiseqartitsisinnaaneratik iluaqutissarsinnaasunut.

Tamatumani eqqarsaatigineqarput inuit folkehøjskolit nerisaqarfiutigalutik ineqarfittut ulloq-unnuarlu perorsaannikkut ikorfartuillutik ilinniartitsinermi avatangiiseqartitsinermik iluaqutissarsinnaasut. Tamanna iluaqutissarsiffiulluartussatut nalilerneqarpoq. Ilinniarfittut nerisaqarfiutigaluni najugaqarfiuneq folkehøjskolit immikkut illuinnartumik ilinniarnermi avatangiiseqartitsisinnaanerannut pissutaaqataavoq.

Matumani ilinniartut ilinniartitsisullu imminnut ataqatigiinnerat atuartitsinerinnarmeersuunngilaq, kisiannili aamma ulluinnarni assigiinngitsutigut pisartunut

attuumassuteqarluni, tamatumunngalu pissutaavoq ilinniarfimmi najugaqatigiillunilu nerisaqarneq ataatsimoorussamillu ulluinnarisarqarneq, taamaalillunilu immikkut illuinnartumik ilinniarnermi avatangiisinik pilersitsisinnaaneq. Taamaalilluni ilimagineqarpoq folkehøjskolit peqataaffigisinnaagaat innuttaasut nalinginnaasumik ilinniarnermi avatangiiseqarlutik, ullorlu atuarfiusoq naagaangat angerlartarlutik ilinniarnermut peqataatikkuminaatsut peqataatilernissaat.

Aammattaaq siunnersuutigineqarpoq, folkehøjskolit pisinnaatitsilerfiusumik ilinniartitsinernik neqeroorutaat, nalinginnaasumik ilinniarfinni allani ingerlanneqartaraluartut, ilinniarfiit pineqartut il.il. suleqatigalugit ingerlanneqassasut. "Il.il."-mut tunngatillugu aammattaaq ersersinniarneqarpoq ilinniartitsinerit assersuutigalugu Piareersarfinit neqeroorutaasartut aammattaaq pineqarmata. Taamaaliornikkut folkehøjskolit ilinniarfiillu pioreersut allat, ilinniakkanik nalinginnaasunik neqerooruteqartartut suleqatigiinnissaannut periarfissat erseqqissarneqarput.

Ilutigisaanik folkehøjskolit siulersuisui pillugit malittarisassat erseqqissarnissaat siunertamut naapertuuttut isigineqarpoq, tassami malittarisassat atuuttut tamanna naammaginnartumik ersersinngilaat. Tamatumani ilaatigut pineqarpoq siulersuisut piffissamut atuuffissaannut piumasagaat.

Aammattaaq siunnersuutaavoq, ilinniakkat ilinniarfinni il.il. allani neqeroorutaasartut, ingerlanneqartassasut ilinniarfimmi tassani nalinginnaasumik ilinniakkamik ingerlatsisartumi ingerlanneqartuugunik akigisassaak akigalugu. Kisiannili ilinniagaq allanit neqeroorutaariinngitsoq pineqarpat, akissaa aalajangerneqassaaq ilinniakkap suussusianut, imarisaanut annertussusianullu atatillugu pissutsit tigussaasut aallaavigalugit, ersarinnerusumik takuuk siunnersuummi §§ 15 aamma 16, taakkununngalu oqaaseqaatit.

Kiisalu allannguutaalut aamma siunnersuutaapput Namminersorluni oqartusaaanermut ikaarsaariarnerup nassatarisaanik. Tassunga atatillugu Namminersorneq pillugu inatsimmi nr. 473-imi, 12. juni 2009-meersumi § 1-imi ersippoq naalackersuinissamik pissaaneq Naalackersuisuniittoq. Aalajangersakkap aalajangersagaq assingusooq inatsisikkullu atorunnaarsinneqartoq allanngortippaa, tassalu Kalaallit Nunaanni Namminersornerullutik Oqartussat pillugit inatsimmi nr. 577-imi, 29. november 1978-meersumi § 1, imm. 2-mi allaqqammat ingerlatsineq Naalackersuisunit (landsstyre) aqunneqassasoq. Tamatuma nassatarisaanik siunnersuutigineqarpoq qallunaatuuani "Landsstyre" taarserneqassasoq imaalersillugu: "Naalackersuisut".

Kiisalu ilisimatitsissutigineqassaaq siunnersuut inatsisiliornermut tunaartarisassat atuuttut naapertorlugit inatsisissatut nutaarluinnartut siunnersuutigineqarmat, Inatsisartut peqqussutaannut atuuttumut allannguutissatut siunnersuutigineqarani, taamaaliornikkut folkehøjskolinut tunngatillugu inatsisiliorneq paasissagaanni inatsisit arlallit sanileriiseqqaarnissaat pinngitsoorumallugu.

3. Aningaasaqarnikkut aamma allaffissornikkut pisortanut kingunerisassai

Siunnersuut Namminersorlutik Oqartussanut kommuninulluunniit toqqaannartumik aningaasaqarnikkut allaffissornikkulluunniit sunniuteqartussatut naatsorsuutaanngilaq, tassami siunnersuutip taamaallaat aalajangersarpari folkehøjskolit ilinniarfinnik allanik oqartusaa sunilluunniit isumaqateqarenermikkut, ilinniakkani pioreersuni holdinik ilassutaasunik aallartitsisinnaanerannut imaluunniit ilinniakkanik pikkorissarnernilluunniit nutaanik aallartitsisinnaanissaannut inatsisitigut sinaakutissat.

Siunnersuummi § 1, imm. 2 naapertorlugu mernguernartulerinerup pilersitsiffiusunullu tunngasut iluanni pisinnaatitsilerfiusumik ilinniartitsineq aallartikkumaneqarpat, tapiinissamullu piumasaqaatit piviusunngortinneqarsimappata, ingerlatsinernik pineqartunik aallartitsinissamut piumasaqaataassaaq, højskolit siunnersuummi § 15 naapertorlugu tapiiffigineqarnerat. Tamatumani ingerlassat nutaat pineqarsinnaammata, annertunerusumik aningaasartuuteqartoqassaaq. Aningaasartuuteqarnerunerup annertussusaanut apeqqutaassapput sorpiaat pineqarnerisut, tassunga ilanngullugit ilinniakkap suussusia, imarisai, annertussusia aamma ukiumut ilinniartuusut amerlassusaat.

Siunnersuummi § 1, imm. 3 naapertorlugu misilitsissutaasinnaasumik atuartitsineq, pineqartut pillugit malittarisassat atuuttut naapertorlugit meeqqat atuarfianni inaarutaasumik naliliinerit ilaannut peqataanissamik, allatut ilinnialissutaasinnaasumik ilinniartitsinermik, inuutissarsiutinik tunngaviusumik ilinniagaqarnissamik aamma ilinniarnertuunngorniartinnit ilinniartitsissutaasartuni faginik ataasiakkaanik ilinniagaqarnissamik siunertaqartoq kissaatigineqarpat, tapiissutit assigissavaat, ilinniagaq ilinniartitsineq il.il. nalinginnaasumik ilinniakkamik neqerooruteqartartumi ingerlanneqartuuppat, ilinniakkamut aningaasartuutaajumaartut nalingat. Ilinniartitsineq tamanna siunnersuummi § 1, imm. 4 naapertorlugu pissaq, ilinniartitsineq imaluunniit oqartussaasup, ilinniakkamik nalinginnaasumik neqerooruteqartartup, suleqatigiinnissamik isumaqatigiissuteqarfigineratigut. Ilinniartitsinerup taamaattup ilinniartitsineq allami pisussaagaluaq taarserpagu, aqqissuussineq aningaasartuutaanerussanngilaq. Ilinniartitsineq ilinniartitsinermut allami ingerlanneqartumut naleqqiullugu annertunerusumik ingerlatsiffiuguni aningaasartuuteqarnerunermik nassataqassaaq.

Ingerlassat taakku Ilinniartitaanermut Pilersaarutip anguniagaanut, tassalu ukioq 2020 nallertinnagu sulisinnaasut 2/3-iisa pisinnaatitsilerfiusumik ilinniagaqarnissaannik anguniakkamut, attuumalluinnassapput, taamaammallu ilinniartitsineq tapiiffiginissaanut ilinniartullu ilinniagaqarnissaannut aningaasaliinissamik pisariaqartitat højskolini ingerlassat annertusinerinut atasut, eqqarsaatigineqarpoq ilinniartitaanermut sillimatinit imaluunniit pikkorissaanernut aningaasaliissutinit assersuutugalugu kontomi pingaarnermut 40.91.03 Pikkorissarnernut imaluunniit 40.01.08 Ilinniartitaanermut immikkoortunut pilersaarut-mit immikkullu ilinniartitaanikkut suliniutinut matussuserneqassasut.

4. Inuutissarsiutinik ingerlatsisunut aningaasaqarnikkut allaffissornikkullu kingunerisassai

Siunnersuutip inuutissarsiutinik ingerlatsisunut naleqqiullugu kingunerisassai nalilerneqarput tassaassasut sulisorisassanik amerlanernik pissarsiornissamut annertunerusumik tunngavissaqalerneq, siunnersuutip pingaarnerusutut siunertaa tunngavigalugu, tassaasoq innuttaasut amerlanerit pisinnaatitsilerfiusumik ilinniagaqassasut. Tamatuma saniatigut oqaatigineqassaaq, siunnersuut efterskolinit imminnut pigisunut sunniuteqassanngimmat, tassami taakku aallaavittut taamaallaat inuusuttunut suli 18-inik ukioqalersimannigitsunut naatsorsuussaapput, nalinginnaasumilli folkehøjskolit taakkunannga utoqqaanerumaanut saaffiginnillutik. Taamaalillutik folkehøjskolit saaffigisaat ukiumikkut efterskolit saaffigisaannit allaanerupput.

5. Avatangiisinut pinngortitamullu kingunerisassai

Siunnersuut avatangiisinut pinngortitamullu sunniuteqassanngilaq.

6. Innuttaasunut allaffissornikkut kingunerisassai

Siunnersuut innuttaasunut allaffissornikkut sunniuteqartussaannigitsutut nalilerneqarpoq, taamaattorli piffissap ingerlanerani innuttaasut amerlanerusut pisinnaatitsilerfiusumik ilinniagaqartuulernissaannut tapertaassasoq ilimagineqarpoq.

7. Oqartussaasunut kattuffinnullu tusarniaaneq:

Siunnersuut 29. maj 2010-miit 2. juli 2010-mut tusarniaassutigineqarpoq ukununnga:

Knud Rasmussenip Højskolia

Sulisartut Højskoliat

Naalakkersuisut siulittaasuata Naalakkersuisoqarfia

Ineqarnermut, Attaveqarnermut Angallanermullu Naalakkersuisoqarfik

Aningaasaqarnermut Naalakkersuisoqarfik

Aalisarnermut, Piniarnermut Nunalerinermullu Naalakkersuisoqarfik

Inuussutissarsiutinut Suliffeqarnermullu Naalakkersuisoqarfik

Isumaginninnermut Naalakkersuisoqarfik

Peqqissutsimut Naalakkersuisoqarfik

Nunamut namminermut, Pinngortitamut Avatangiisinullu Naalakkersuisoqarfik

Aatsitassanut Pisortaarfik

SIK

Kalaallit Nunaanni Sulisitsisut Peqatigiiffiat (GA)

KANUKOKA

Aasianni Ilinniarnertuunngorniarfik

HTX, Sisimiut

Nuummi Ilinniarnertuunngorniarfik

Qaqortumi Ilinniarnertuunngorniarfik

HHX, Qaqortoq

NUSUKA

IMAK

Saviminilerinermik Ilinniarfik, Nuuk

Sanaartornermik Ilinniarfik

INUILI

ATI

Imarsiornermik Ilinniarfik, Paamiut

Niuerinermik Ilinniarfik, Nuuk

Niuerinermik Ilinniarfik, Qaqortoq

Peqqissaanermik Ilinniarfik, Nuuk

ASG (Akademikernes Sammenslutning i Grønland/ Ilinniagartuut Kattuffiat)

ICC

Ilisimatusarfik

Oqaatsinik Pikkorissarfik

Perorsaanermik Ilinniarfik

Tusarniaanermut atatillugu tusarniaaffigisanit makkunanga akissuteqaatinik tigusaqartoqarpoq: Naalakkersuisut siulittaasuata Naalakkersuisoqarfia, Aatsitasaqarnermut Pisortaarfik, Peqqissutsimut Naalakkersuisoqarfik, Inunnik Isumaginninnermut Naalakkersuisoqarfik, Aningaasaqarnermut Naalakkersuisoqarfik (AN), Peqqissaanermik Ilinniarfik (PI), IMAK, Sulisartut Højskolia, Knud Rasmussenip Højskolia, Kalaallit Nunaanni Sulisitsisut Peqatigiiffiat (GA), SIK, Kommuneqarfik Sermersooq aamma Qeqqata Kommunia.

Naalackersuisut siulittaasuata Naalackersuisoqarfia, Aatsitassaqaqarnermut Pisortaqarfik, Peqqissutsimut Naalackersuisoqarfik, PI aamma Inunnik Isumaginninnermut Naalackersuisoqarfik siunnersuut pillugu oqaaseqaatissaqanngillat, SIK-llu Sulisartut Højskoliata tusarniaanermut akissutai innersuullugit. Saniatigut eqqaaneqarsinnaavoq, marts 2010-mi Knud Rasmussenip Højskoliata siulersuisui tamarmiusut ataatsimeeqatigineqarmata, tassanilu siunnersuut ilalernartinneqarmat, taamatullu Sulisartut Højskoliata pisortai siunnersuut pillugu ataatsimeeqatigineqarnikuupput, siunnersuutillu periarfissaritarilerumaagai nutaat ilalerneqarlutik.

AN-ip aallaqqaammut eqqaavaa, siunnersuut tassaasoq siunertaani aalajangersakkanik annertusaaneq, tassuunakkullu folkehøjskolit pisinnaatitsilerfiusunik ilinniartitsinissaminnut annertunerusumik periarfissinneqartut, aammattaaq AN-ip ilinnialerumallutik qinnuteqartartut amerliartortut nammattunik neqeroorfigisinnaanissaannik qularnaarinissamik siunertaqarneq, suliniutitut inuiaqatigiinnut iluaqutaasussatut akuersaarpaa. Taamaattoq AN-ip apeqquuserpaa, sooq assingusumik efterskolinut atuuttoqanngitsoq. Tassunga atatillugu oqaatigineqassaaq, efterskolit iliniartitsinernik pisinnaatitsilerfiusunik efterskolit saaffigisaannut - tassalu ilinniartunut sulii 18-iliineqanngitsunut - neqerooruteqartarmata. Tassunga atatillugu ersippoq efterskolit, ilinniartitsinernik meeqqat atuarfianni inaarutaasumik naliliinernut misilitsinnernullu piareersaasunik neqerooruteqarsinnaasut.

Ilutigisaanik AN-ip kaammattuutigaa Inuussutissarsiornermut Suliffeqarnermullu Naalackersuisoqarfiup akissutaa suliap ingerlateqqinnerani ilanngunneqassasoq, Piareersarfinnut tunngasut erseqqissarnissaat siunertaralugu. Tassunga atatillugu oqaatigineqassaaq Inuussutissarsiornermut Suliffeqarnermullu Naalackersuisoqarfimmit tusarniaanermut akissummik tigusaqartoqanngimmat, kisiannili kommuninit qulaani taaneqartunit arlalinnillu Piareersarfeqarfiusunit akissuteqartoqarluni. Tassunga atatillugu KANUKOKA nalunaarpoq, kommunit akissuteqartut marluk eqqaasaannut ilassutissaqarani.

Aammattaaq AN-ip apeqqutigaa ilinniakkat maanna pioreersut nukissat taakku atorluarnissaat siunertaralugu annertusaaviginissaat pitsanngorsarnissaallu eqqarsaatigineqarsimanersoq. Tamatumunnga ilanngullugu aammattaaq AN-ip - IMAK-ip GA-llu akissummini eqqaasaattut - apeqqutigaa, ilinniartitsisut ilinniartullu ilinniartitsinernik pioreersuni katersuuttariaqannginnersut. GA-p tamatumunnga atatillugu tikkuarpaa, Piareersarfiit aamma Kalaallit Nunaanni Danmarkimilu efterskolit, meeqqat atuarfianni killiffiup assinganik ilinniartitsinernik neqerooruteqartareersut.

Qeqqata Kommuniata tusarniaanermut akissummini eqqaavaa, innuttaasut piginnaasaasa annertusarnissaat siunertaralugu pisortat namminersortullu suleqatigiinnerunissaat tapersersoraluarlugu, siunnersuut isumaqatiginagu. Tamatumunnga pissutaatinneqarpoq, kommunip isumaa naapertorlugu folkeshøjskolit nalinginnaasumik peroriartuutaasumik ilinniartitsineq qitiutittariaqarmassuk, tassami ilinniartut ilisimasaasa kulturikkullu piginnaanerisa nalinginnaasumik peroriartuutaasumik inerisarnissaat folkehøjskolit suliassaraat. Kommuni aammattaaq isumaqarpoq, meeqqat atuarfiata Piareersarfiillu pisinnaatitsilerfiusumik piukkunnarsaanissaq namminneq sapinngikkaat.

Ilinniartitsinernik periarfissanik qitiusumiit ingerlatsileriarternormut tunngatillugu Qeqqata Kommuniata aamma AN-ip GA-llu tusarniaanermut akissutaanut naleqqiullugu siullertut oqaatigineqassaaq, ilinniartitsinernik pineqartut sinaakkutaat malinnaavigineqartuarmata, aammattaaq siunnersuut matuma suliarinerani. Naalackersuisut nalinginnaasumik meeqqat atuarfiata ilinniartitsinikkullu aqqissuussinerit ataatsimut isigalugit tamatigut pitsaasusiisa

qularnaarnissaat. Taamaammat Naalackersuisut pilersaarutigaat pitsanngorsaatisaanik siunnersuuteqarnissaq, meeqqat atuariannik naliliinissaq pilersaarutaasoq suliniutillu arlaqartut maanna ingerlasut inerneru saqqummerneqariarpata.

Kisiannili ilutigisaanik aamma nassuerutigisariaqarpoq inuit ataasiakkaat piginnaaneri aallaavigalugit ilinniakkanik neqerooruteqarnissaq pisariaqartinneqarmat, inuiaqatigiit kikkut tamarmik pisariaqartinneqarlutillu inissaqartinneqarfigisaasa - kikkullu tamarmik ineriartornissaminut imminnullu pilersugarinissaminut periarfissaqarfigisaasa - pilersinnissaannik takorluugaqarlunilu anguniagaqarneq aallaavigalugit.

Naalackersuisut suleqatigiinnissamik isumaqatigiissutaanni oqaatigineqartut aammattaaq Naalackersuisut isumaqarput kalaallit inuunermik isiginneriaasianni tunngavioq "suut tamarmik imminnut ataqatigiinnerannik" isiginneriaaseqarneq, tamannalu ilinniartitsinermut nuukkaanni isumaqarpoq, meeqqanik, inuusuttunik inersimasunillu piukkunnarsaaneq ataqatigiissumik ingerlatsinertut isigisariaqartoq, tamatumaniilu aaqqissuussineq inissaqartitsisariaqarpoq kikkut tamarmik inuiaqatigiinni ataatsimoornermut peqataanissaannut, inuttut naleqqatigiillutik, inuillu ataasiakkaat pisinnaasaat, kissaataat pisariaqartitaallu inissaqartillugit.

Aammattaaq siunertarineqarpoq, ilinniartitsinikkut aaqqissuussineq qaqugukkulluunniit aaqqissuunneqassasoq ineriartortarneq ilikkariartortarnerlu pillugit ataatsimoornermut isiginneriaaseqarneq aallaavigalugu, inunnillu isiginneriaaseqarnissaq, atuartut ilinniartulluunniit ataasiakkaat periarfissaannik pisinnaasaannillu, aamma kikkulluunniit ilinniarumasut ilinniartitsinernik aaqqissuussinerup iluani "matunik matoqqasunik" ingerlaqqeriansinnaajunnaartitaanernilluunniit naapitaqannginnissaannik tapersiisumik.

Annermik kikkut tamarmik peqataatinnissaannik kissaateqarnermut kiisalu ikerinnakkut ilinniarunnaartarnermik akiuiniarnermut naleqqiullugu, folkehøjskolit immikkorluinnaq avatangiiseqartitsisinnaapput, kalaallit kulturiata pingaartinneqarlunnarfisaaq. Tamanna ilikkagassat nutaat ilisimariikkanut toqqaannartumik atassuserneqarsinnaatillugit, ilinniartullu kulturikkut, oqaluttuarisaanermut inooqatigiinnermullu atatillugu ilisimariigaanik avatangiiseqartitsilluni ilikkariartortarnerup pitsaanerpaasarnernik paasisanut attuumassuteqarpoq. Tamatumunnga atatillugu pineqarput avatangiisit folkehøjskolit piunertik tamaat ilisarnaatigilersimasaat.

Tassunga atatillugu siunnersuummut attuumassuteqarpoq inunnik isiginneriaatsip, ilikkariartornermik isiginneriaatsip inuunermillu isiginneriaatsip ilinniartitsinermik aaqqissuussinermut attuumasut tunngavigilluinnarmassuk, suut tamarmik aningaasannorlugit aningaasanillu atuilluarnerpaanissaq aallaavigalugit naatsorsorneqarsinnaanngimmata, tassami pineqartut tassaapput inuit, assigiinngitsunik tunuliaqutaqarlutillu piginnaasallit. Taamaammat nukissanik pitsaanerpaamik atuneq arlalitsigut aallaqqaammut naleqqutinngitsutut isikkoqarsinnaasarpoq, piffissamili ungasinnerusumi aatsaat malunniuttarluni.

Innuttaasut tamaasa peqataatinnissaat siunertarlugu ilinniartitsinernik assigiinngisitaartunik neqerooruteqarnissamik kissaateqarneq naapertorlugu, folkehøjskolit ilinniarfinnik pioreersunik ilinniartitsinernik neqeroorsinnaaneq pillugu isumaqateqarsinnaanerit siunnersuutip ammaappaa. Tamanna annermik naapertuuppoq inunnut folkehøjskolit najugaqarfiutugalugu ilinniarfittut iluseqarnerannik ilinniarnerminni iluaqutissarsisinnaasunut.

Qulaani taaneqartutut, ilinniartut ilinniartitsisullu akornanni pissutsinut ilinniartitsinermit imminnut ilisarisanerit kisimi ilisarnaqutaanngilaq, aammali ulluinnarni nalaattakkamikkut assigiinngitsorpassuartigut ilinniartut ilinniartitsisullu imminnut qanillisarput. Tamatumunnga pissutaavoq ilinniarfimmil najaqarlunilu nerisaqarneq, ataatsimoorussamillu ulluinnarisarqarneq, immikkorluinnaq ittunik ilikkariartornermi avatangiiseqartitsilersartoq. Tassuunakkut højskolit innuttaasut, nalinginnaasumik avatangiiseqarlutik, ulloq naasorlu ilinniarfimmilik qimatsisarlutik, ilikkariartornissaminnik ajornakusoortitsisartut, ilaatilersinnaavaat.

Taama ilikkariartornermi avatangiiseqartitsisinnaaneq ilinniarfinni pioreersuni imaluunniit Piareersarfinni atuutinngilaq. Piareersarfiit 2006-imi pilersinneqarneriniilli atuagarsorluni ilinniartitsinerit aallunneqarsimapput, tassalu AEU (akuerisaasumik inuutissarsiutinik ilinniartitsinerit ilisaritsisilluni pikkorissarnerit) aamma FA (meeqqat atuarfianni inaarutaasumik misilitsinnerit). Neqeroorutit taakku piumaneqassusiat ilimagisamiit annertuneroqaaq, annermik innuttaasut inuusunnerusut akornannit.

Piareersarfinni suliniutit allatut ilusillit aallartinnissaat pimoorullugu sulissutigineqarpoq, ilaatigut piginnaanngorsaaneermut atatillugu saaffigisat allat kajumilersinnissaat, innuttaasut ilitersornissaat aamma atuagarsornerunngitsumik piginnaanngorsaaneerit nukittorsarnissaat siunertaralugit. Kisiannili tamakku ilinniartitsinerit nalinginnaasumik avatangiiseqartitsilluni neqeroorutaajuassapput. Taamaammat folkehøjskolit peqataatinnissaat qitiutinneqarpoq, højskolit ilinniartitsinerminni ulloq-unnuarlu perorsaanikkut aallussiviusinnaasumik immikkut avatangiiseqartitsisinnaanerannik ilinniartut iluaqutissarsinnaasut eqqarsaatigalugit.

Inuusuttut ukioqatigiiaat 12%-iinnaat toqqaannartumik ilinnialernissamut piareersimasutut misigisarputa - ukiut marluk qaangiunneranni 42%-it missaanniilersimasarlutik - immikkut ittunik avatangiiseqartitsilluni ilinniartitsinerit pilersinnissaat siunertaralugu ilinniartitseriaatsinik inerisaanissaq akornusissallugu tulluarpasinngilaq.

Ilutigisaanik erseqqissarneqassaaq, siunnersuut imaanngimmat, folkehøjskolit ingerlaannarlutik assersuutigalugu ilinniarnertuunngorniarfinni imaluunniit inuutissarsiutinik tunngaviumik ilinniarfinni ilinniartitsissutaasartunik neqeroortalissasut, tassami taamaallaat taamaaliortoqarsinnaavoq, tamanna pillugu ilinniarfimmik ilinniakkanik taamaattunik nalinginnaasumik neqerooruteqartartuusumik isumaqatigiissuteqartoqarsimappat. Tamannattaq Piareersarfinnut tunngatillugu atuuppoq, tassami ilinniartitsinerit piukkunnarsarnernilluunniit taakkunani ingerlanneqartareersunik neqerooruteqartoqassappat, Piareersarfiit tamanna pillugu isumaqatigiissuteqarfigeqqaarnissaat piumasaavoq. Tassunga tunngatillugu taamaallaat ilinniartitsinerit mernguernartulerinermut pilersitsinermullu tunngasut, ilinniartut nalinginnaasumik peroriartuutaasumik, ilinniakkanut tunngasutigut inuttullu pisinnaasaannik annertusaanissamik siunertaqartut ilinniarfinnik allanik il.il. nalinginnaasumik ilinniakkamik neqerooruteqartartuusumik isumaqatigiissuteqaaqqaarani ingerlanneqarsinnaapput.

Aammattaq eqqaamaneqassaaq, folkehøjskolit inatsisitigut namminersortuummata imminnut pigisutut inissisimanertik pissutigalugu. Tassunga atatillugu folkehøjskolit inatsisitigut namminersortutut tunngaveqarnerannut naapertuutinngilaq, ilinniarfiit qanoq isumaqatigiissuteqarsinnaatigissanerit pisortaniit killilersoqqissaarneqassappat. Tamatumunnga atatillugu siunnersuut malillugu folkehøjskolit ilinniakkanik pisinnaatitsilerfiusunik neqeroorsinnaalernissaannik GA-p pingaarnerusutigut ernummataanut tunngaviugunarpoq, kukkusumik isumaqartoqarmat siunnersuutip akuersissutigineratigut,

Inatsisartut folkehøjskolerit peqqussagaat assersuutigalugu ilinniarnertuunngorniarfinni atuartitsissutinik imaluunniit inuutissarsiutinik tunngaviusumik ilinniakkanik neqerooruteqartassasut.

Tassunga tunngatillugu erseqqissarneqassaaq, oqaatigineqareersutut siunnersuutip taamaallaat siunertarimagu, folkehøjskolerit - tamanna pillugu ilinniarnertuunngorniarfinnik pioreersunik isumaqatigiissuteqareernikkut - inuiaqatigiinni piginnaasat qaffassarnissaannik suliaqarnermut peqataasinnaalernissaannik ammaassinissaq, tamatumani pineqarpat ilinniartitsineq, ilinniarnertuunngorniarfinnit allanit neqeroorutigineqartareersoq. Allatut oqaatigalugu siunnersuutip taamaallaat siunertarivaa eqaannerusumik inatsisiliornissaq, folkehøjskolerit pisinnaatitsilerfiusumik ilinniartitsinernik neqerooruteqartartunik isumaqateqarsinnaaneramik periarfissiisumik.

Aammattaaq eqqaaneqassaaq, folkehøjskolerit pisinnaatitsilerfiusumik ilinniartitsinissamik isumaqatigiissutigiuunngorniarfinni Naalakkersuisunit akuerineqartussaammata, tak. siunnersuummi § 1, imm. 4, naggatit aappaat. Tamanna folkehøjskolini ilinniakkat ilusaannik toqqaanissap Naalakkersuisunit suliaasaaneranut sanilliullugu isiginiagassaavoq, tamannalu nalilersuilluareernikkut pisassaaq immikkut ittumik ilinniartitaanikkut suliniutinik aqutsisooqatigiit ilinniakkat ilusaat, ilinniakkat annertussusiat aamma aningaasanut tunngasut pillugit inassuteqareernerisigut.

Aammattaaq eqqaaneqassaaq, inuutissarsiutinik tunngaviusumik ilinniartitsineq folkehøjskolimi neqeroorutaareermat, tassalu Arnat Ilinniarnertuunngorniarfiat, Knud Rasmussenip Højskolianut attuumassuteqartoq, taassumalu inatsisitigut tunngavigisaa siunnersuut akuerineqarpat ataavartunngortinneqassaaq, tassami Arnat Ilinniarnertuunngorniarfiata maanna inatsisitigut tunngavigisaa tassaavoq inatsimmi pioreersumi misileraasinnaanermik aalajangersagaq.

Aammattaaq AN aperivoq, 11. klassit atorunnaarsinnerisa nassatarisimaneraat pisinnaatitsilerfiusumik ilinniarnertuunngorniarfiit ilaneqarnissaasa pisariaqartinneqalernerat, taamatullu GA aperilluni "Atuarfitsialammut" atatillugu 11. klassit atorunnaarsinneqarnerat siunertamut naapertuuttuusimanersoq. Taamaattoq 11. klassit atorunnaarsinnerisa immikkut ilinniakkanik neqerooruteqarnissamik pisariaqartitsilerneq imminnermini nassatarisimaneraat uppersaatissaqanngilaq, taamatullu malugeqquneqassaaq, 2013-imi aatsaat ukioqatigiit siulliit meeqqat atuarfiat naamassissammassuk, "Atuarfitsialak" pillugu inatsisit malillugu tamakkiisumik tiimeqarlutik.

Folkehøjskolerit siunnersuut malillugu meeqqat atuarfiannit inaarutaasumik misilitsinissaq siunertaralugu ilinniartitsinermik neqeroorsinnaanissaannut paarlattuanik aallaaviupput, qulaani taaneqartutut folkehøjskolerit ilinniarnertuunngorniarfinni avatangiiseqartitsisinnaanerit, ilinniartut aalajangersimasut ilinniaqissinnaalernissaannut naleqqiullugu immikkut sunniuteqarluarsinnaasunik.

Ilutigisaanik AN-ip siunnersuutip aningaasatigut kinguneriumaagai itisileqquai, siunnersuutillu pisinnaatitsilerfiusunik ilinniartitsinernik nukittorsaanissaa tunngavilersoqqullugu, aammattaaq IMAK-ip GA-llu piviusorpalaartuusorinngilaat, siunnersuut aningaasaqarnikkut sunniuteqannginnissaa. AN-ip oqaaseqaatai tusaaniarneqarput, ilaatigut immikkoortoq 3-mut oqaaseqaatini. Tassunga ilanngullugu erseqqissarneqassaaq, ilinniarnertuunngorniarfinnik ilinniakkanik nalinginnaasumik neqerooruteqartartuusunik isumaqatigiissuteqarneq tunngavigalugu folkehøjskolerit

ilinniaqatigiinnik nutaanik pilersitsinissamik neqerooruteqassappata, aningaasartuutit Nunatta Karsianut taakkuujuassammata.

Ilinniagaq suli pilersinneqanngitsoq pineqarpat, folkehøjskolini ilinniaqatigiinnik pilersitsinerup, Namminersorlutik Oqartussat ilinniarfiisa arlaanni pilersitsineq akeqatigissavaa. Tamatuma soorunami Inatsisartut kissaatigigunikku ilinniartitsinermi ingerlassanik immikkut ittunik aallartitsinissaq siunertaralugu amerlanerusunik aningaasaliisinnaaneranit mattutinngilai, tamannali siunnersuummi piumasagaataanngilaq.

GA-p aammattaaq siunnersuutigaa aalajangersakkat taxameteri malillugu naatsorsuisarnermut tunngaviusumillu tapiissutinut tunngasut pisinnaatitsilerfiusumik ilinniartitsinermut attuumasut peerneqassasut, tamannalu akuerineqarpoq. Taamaaliortoqarpoq erseqqissarumallugu tapiisarnermut tunngatillugu apeqqut aalajangiunneqartassasooq, ilinniakkap ilinniarfimmi il.il. nalinginnaasumik ilinniakkamik neqerooruteqartartumi ingerlanneqartuuguni qanoq akeqarumaarneranut naleqqiullugu.

Tamatuma saniatigut GA-p apeqqutigaa meeqqat atuarfianni atuartitsissutaasartut neqeroorutigineqartut nalilerneqarnissaat siunertaralugu kalluarneqartussat aggersarneqartarnissaat siunertamut naapertuuttuunnginnersooq. Tamanna pisariaqartutut isigineqanngilaq, tassami siunnersuutip kalluarneqartussat arlaannaalluunniit pisussaaffilinngilaa, taamaallaalli folkehøjskolinut naleqqiullugu suleqatigiinnissamut periarfissat maanna pigineqanngitsut saqqummiullugit. Assersuutigalugu Piareersarfiit imaluunniit qitiusumik ilinniarfiit suleqatigiinnissamut periarfissanik siunnersuutip ammaasaanik qanoq atuiumatiginerat, Piareersarfiit qitiusumilluunniit ilinniarfiit namminneq aalajangigassaraat.

Tamatuma saniatigut IMAK-ip oqaatigaa, pisinnaatitsilerfiusumik ilinniartitsinissamut periarfissaq pineqartup iluani tapertaasumik periarfissatut isigalugu, tamannalu siunnersuummut naapertuuppoq.

Taamaattoq IMAK-ip aamma GA-p aammattaaq malugeqqaat, meeqqat atuarfianni inaarutaasumik naliliinissaq siunertaralugu ilinniartitsineq meeqqat atuarfiannik salliutitsinissaq akigalugu pissanngimmat, tamannalumi siunnersuutip siunertarinngilaa. Tassunga ilanngullugu aammattaaq oqaatigineqassaaq, meeqqat atuarfianni inaarutaasumik naliliineq siunertaralugu ilinniartitsinerujunnartoq pisussaammat, meeqqat atuarfianni inaarutaasumik naliliinissaq siunertaralugu ilinniartitsinermik ingerlatsisareersumik isumaqatigiissuteqarneq tunngavigalugu. Aammattaaq tassunga atatillugu siunnersuummi taamaallaat pineqanngillat ilinniakkatigut piukkunnarsarnissaq meeqqat atuarfianni killiffiup naleqqataa, kisiannili periarfissikkumaneqarmat ilinniartut pisariaqartitsisut ilinniakkatigut inuttullu ilinniaqqinnissaminnut piareersarnissaasa qularnaarnissaat.

Ilutigisaanik GA periarfissaasinnaasunik allanik siunnersuuteqarpoq, folkehøjskolini ingerlanneqarsinnaasut amerlanerit qularnaarnissaat folkehøjskolillu ilinniartitsinernik pisinnaatitsilerfiusunik ingerlatsinissamut peqataatilermissaat siunertaralugit. Tassunga atatillugu oqaatigineqassaaq inatsisissatut siunnersuutip GA-p periarfissatut siunnersuutigisaasa piviusunngortinnissaat minnerpaamilluunniit akornusinngimmagu.

Aammattaaq IMAK siunnersuuteqarpoq, eqqarsaatigeqqullugu 11. klassimik nammineq piumasuseq naapertorlugu peqataaffigineqartartussamik folkehøjskolini pilersitsisoqarsinnaanera, nukissat eqaannerusumik katersornissaat taamaalillunilu

aningaasanik atuilluarnerunissaq siunertaralugu. Tassunga atatillugu nikerarluartunik ilinniakkatigut neqerooruteqarsinnaanissamik kissaateqarneq pillugu oqaatigineqartut innersuunneqassapput, aammattaaq oqaatigineqassaaq, ilinniartitsinikkut iluarsartuusseqqinnerit allannguiartuaarnerummata tamakkiisumik piviusunnngortinnissaat sivisooq, tamatumanilu meeqqat atuarfiat ukiuni qulini atuartitsisarnermut suli sungiussiartuaarmat. Ikaarsaariarnermi tassani Piareersarfiit ataanni siunnersuullu malillugu folkehøjskolini AEU-mik aamma FA-mik pikkorissaasarnerit, innuttaasunut meeqqat atuarfianni nalinginnaasumik ilinniartitsinermi avatangiiseqarlutik naammaginartumik pissarsisimannngitsunut periarfissiipput.

Aammattaaq IMAK-ip aamma GA-p ernumanartippaat siunnersuutip aammattaaq inuusuttut 18-it inorlugit ukiullit folkehøjskolini ilinniartunnngorsinnaanissaat ammaappasimmagu, tassami oqaaseq "inersimasut" siunnersuummiit peerneqarsimavoq, Inatsisartut peqqussutaata atuuttup § 1-ianut sanilliullugu. Tassunga atatillugu siulliullugu oqaatigineqassaaq, inatsimmi atuuttumi oqaatsip atorneqartup aallaavigimmagu danskit pisinnaatitsillutik inatsisaat maanna atorunnaarnikoq, tassaasoq Kalaallit Nunaanni folkehøjskolit pillugit inatsit nr. 609, 23. december 1980-imeersoq, Namminersornerup eqquneratigut atorunnaartoq. Taamaalilluni oqaaseq inatsimmik taamani atuuttumik Danmarkimilu Folketingimit akuerisaasumik issuaaneruvoq, taamaalillunilu qallunaat inatsisaat tamatumunnga atatillugu nikerarluartunik tamatigoortunillu ilinniakkatigut neqerooruteqarsinnaanisamik pingaarnerusutigut kissaateqarnermut naleqqiullugu pisariaqanngikkaluartumik killiliilluni.

Aammattaaq siunertamut naapertuuttut isigineqanngilaq aalajangersimasunik ukioqarnissamik piunasaqaatit aallaavigalugit killilersuinissaq, tassami pingaarnerpaatut isigisariaqartoq tassaavoq ilinniartitsinermik neqeroorutit qanoq issusiat. Tassunga atatillugu siunertamut naapertuuttuussanngilaq, immikkut ilinniartitsinermik soorlu inuusuttunut højskolernermik pilersitsisoqarsinnaassanngippat, soorlu aasaanerani, inuit 18-it inorlugit ukiullit peqataaffigisinnaanngisaannik, aalajangersimasumik ukioqalersimanissamik apeqqut kisiat peqqutigalugu. Taamatuttaaq danskit inatsisaanni oqaasertaliussa q siunnersuutip pingaarnerusutigut siunertaanut naapertuuttutut isigineqanngilaq - tassalu folkehøjskolit pillugit inatsisip eqaannerulersinniarnan.

Aammattaaq IMAK-ip kissaatigaa folkehøjskolini ilitsersuinermit tunngatillugu erseqqissunik malittarisassaqaarnissaq, ilinniartut sumi ilitsersorneqarsinnaanerminnik nalornileqqunagit. Tassunga atatillugu siunnersuummi § 6-imi ersereerpoq, folkehøjskolit ilinniartut naammaginartumik ilitsersorneqarnissaat qularnaassagaat, taamatullu aamma Piareersarfinni ilitsersuisoqarsinnaavoq, ilinniartut folkehøjskolimiittut Piareersarfinniit innersuunneqarlutik højskolerpata. Ilitsersuinermit tamatumunnga apeqqutaassaaq ilinniartitsineq qanoq ittoq pineqarnersoq. Aammattaaq ilitsersuinermit tunngatillugu apeqqutit, isumaqatigiissutini ilinniakkanik neqerooruteqartartunik pioreersunik isumaqatigiissutaajunnartuni ilaassapput.

Tamatumunnga atatillugu Kommuneqarfik Sermersuup siunnersuutigaa, siunnersuummi § 6, imm. 2-mut tunngatillugu folkehøjskolit ilinniarfiillu allat akornanni ilinniartunnngortitsisarnermi piunasaqaatit, najukkami ilinniarfinnit ilitsersorneqarsinnaaneq il.il. pillugit assigiissarinissaq qularnaartariaqartoq, suliat akimorlugit suleqatigiissitanik pilersitsinikkut. Tassunga atatillugu oqaatigineqassaaq paasissutissiisarnerit ilinniagaq arlaanniluunniit neqeroorutaagaluarpat, ilitsersuinerit ilinniagaq apeqqutaatillugu ilinnialissagaanni piunasaqaatit pillugit paasissutissiinerit ilanngullugit, assigiinnik piunasaqaateqarfigineqarmata.

Ilutigisaanik siunnersuummi § 1, imm. 3, naggatit aappaanni ersippoq, ilinniartitsineq ilinniakkami pineqartumi nalinginnaasumik atuuttunut nallersuussinnaassasoq. Tamatuma nassataraa, folkehøjskolit ilinniartitsinermik pissusissamisuuqinnartumik ilaattut ilinniartut ilinniaqqinnissaat pillugu ilitersorneqarnissaannik neqeroorfigisassagaat. Taamaammatt siunnersuut ataqatigiissaareqatigiittartussanik pilersitsinissaq pillugu imaqaangilaq, tamannalu sanilliunneqassaaq, ilinniarfik sumiikkaluarpalluunniit ilitersorneqarnissaq, ilinniartunngussagaanni piomasagaatit il.il. pillugit paasissutissiisoqartartussaananut.

IMAK-ip aammattaaq ernumanartippaa, pisinnaatitsilerfiusumik ilinniartitsisoqartalernissaa nalinginnaasumik peroriartuutaasumik ilinniartitsineq akigalugu, taamaammallu IMAK-ip siunnersuutigaa pisinnaatitsilerfiusumik ilinniartitsineq højskolimi ilinniartitsinermut tamarmut naleqqiullugu annertunerpaaffissalernerneqassasoq. Tassunga atatillugu oqaatigineqassaaq, siunnersuut ilinniartitseriaatsit arlaat salliutillugu pingaarnerniit tulleriiaarinermik imaqaangimmat, taamatullu siunnersuutip piomasaraa nalinginnaasumik peroriartuutaasumik ilinniartitsineq folkehøjskolit ingerlatsineranni suli pingaartinneqarluni inissisimajuassasoq. Aammattaaq immikkuualuttut ilanngussuullugit killilersuilluni aalajangersaanissaq siunertamut naapertuuttut isigineqaangilaq folkehøjskolit inatsisitigut nammineertut inissisimanerannut naleqqiullugu, taamatullu killilersuinerit inuiaqatigiinnut allanngoriartortunut, allannguisinnaanerup naleqqussarsinnaanerullu immikkut piumanearfigisaannut, naapertuutinnngillat.

Kiisalu IMAK-ip inatsisilioriaatsikkut pissutsit tikkuarpai, taakkulu akuersaarneqarput.

Sulisartut Højskoliata aallaqqaasiullugu eqqaavaa, siunnersuutip siunertaa, tak. siunnersuummi § 1, akuersaarlugi, ilassutigaluguli aalajangersakkami imm. 3 - pingaarnerusutigut tassaasoq siunnersuutip nutaartaa pisinnaatitsilerfiusumik ilinniartitsisinnaalernissamut tunngasoq peqqussutitut isiginagu. Tassunga atatillugu oqaatigineqaannassaaq, iluoommat aalajangersagaq peqqussutaanngitsoq, kisiannili "-sinnaavoq"-tut aalajangersagaalluni, taamaallaat folkehøjskolit pisinnaatitsilerfiusumik ilinniartitsinernik neqerooruteqarsinnaalernissaannut periarfissiisoq.

Aammattaaq Sulisartut Højskoliata tikkuarpaa § 4, imm. 2-mi kalaallisut qallunaatullu oqaasertai assigiinngitsut, tassungalugu atatillugu oqaatigalugu piomasagaatit annertussaqisut, qallunaatuani oqaatigineqartutut, ilinniartut misilitsinnissaq pisinnaatitaaffigissappassuk. Oqaaseqaat ilalernerqarpoq, kalaallisut oqaasertaani ersarissarneqarluni pisinnaatitaaffik pineqartoq. Aalajangersagaq folkehøjskolimi pisinnaatitsilerfiusumik ilinniartitsinerup malittarisassat ilinniakkap atuuttut naapertorlugit ingerlanneqarnissaanik piomasagaammatt sanilliunneqassaaq. Taamatullu ilinniagaq ilinniarfinnut nalinginnaasumik ilinniakkamik neqerooruteqartartunut naleqqiullugu pitsaassutsimigut assinganik qaffasissuseqartussaavoq. Tamatuma saniatigut erseqqissarneqassaaq, folkehøjskolit siunnersuutip periarfissarititai tunngavigalugit soorunami aatsaat pisinnaatitsilerfiusunik ilinniartitsisassammata, taamaaliornissaq namminneq piviusunngortissinnaasutut isigigamikku.

Sulisartut Højskoliata aamma eqqaavaa, siunnersuummi § 7-imut naleqqiullugu aningaasalersorneqarnissaq pisariaqassasoq, ilinniartitsinerup nalinginnaasup avataatigut ilinniartitsisoqassappat. Tassunga atatillugu eqqaaneqassaaq immikkut atuartitsisinnaanermmut periarfissaq taamaallaat ilanngunneqarmat folkehøjskolinut periarfissatut, imaappoq pisussaaffiunngimmat. Arlaatigut pisariaqalissappat meeqqat atuarfiata ingerlattagaanik

immikkut atuartitsisoqarnissaa tassungalu atatillugu aningaasalersuinissaq oqallisigineqarluni, tamanna pisinnaassaaq siunnersuummi § 7 inatsisitigut tunngavigalugu.

Tamatuma saniatigut Sulisartut Højskoliat isumaqarpoq, folkehøjskolit ataasiakkaat namminneq aalajangertariaqaraat siulersuisut 5-inik imaluunniit 7-inik ilaasortaqaassanersut, tamannalumi siunnersuummi § 8-mi tunngavissinneqarpoq, tassami siulersuisut ilaasortaasa qasserpiaanissaat folkehøjskolip ileqqoreqqusaani aalajangerneqassapput, tak. siunnersuummi § 11, imm. 3, nr. 6.

Sulisartut Højskoliata aamma apeqqutigaa, siulersuisunik nutaanik qinersisoqassanersooq, siunnersuut 1. januar 2011 atuutilersussatut akuerineqassappat. Tassunga atatillugu siunnersuummi § 23, imm. 3-mi ersippoq, maanna siulersuisuusut qinigaaffitsik naallugu ingerlaannassasut.

Tamatuma saniatigut Sulisartut Højskoliata kissaatigaa, siunnersuummi § 8, imm. 3, siulersuisut pisinnaasariaqagaannut tunngasut, peerneqassasoq - annermillu tunngavilersuisoqarani. Oqaaseqaat ilalernerneqanngilaq, folkehøjskolit aqutsisuisa nukittorsarnissaat pissutigalugu, tamannalu pissaaq aqutsisut folkehøjskolit akisussaaffiinut, siunnersuut naapertorlugu annertusineqarsinnaasunut sanilliullugu, sapinngisamik piginnaaneqarluarlutillu suliamik ilisimasaqarluartuunissaasa qularnaarnerisigut. Saniatigut oqaatigisariaqarpoq folkehøjskolit ingerlatsinerisa annersaat pisortanit aningaasalersorneqarmat, taamaammallu pissusissamisoortutut isigineqarmat siulersuisut tamarmiusut pisinnaasariaqagaannut naleqqiullugu piumasaqaateqarnissaq.

Aammattaq Knud Rasmussenip Højskoliata tusarniaanermut akissummini siulersuisut aalajangersimasunik pisinnaasaqartariaqarnerannik piumasaqaateqarnissaq taperserpaat, siunnersuummi periarfissatut taaneqartut piviusorpalaartumik ingerlanneqarsinnaassappata. Taamaattoq Knud Rasmussenip Højskolia aamma isumaqarpoq, siulersuisuni ilaasortat ataasiakkaat, siunnersuummisut pisinnaasaqanngikkaluartut inissaqartinneqarnissaat periarfissaasariaqartoq, tassami "inuinnaat" folkehøjskolimik soqutiginnittut, isiginneriaatsimik inuppalaartumik tunniussaqaarsinnaapput. Tassunga atatillugu erseqqissarneqassaaq, piumasarineqartutuaq tassaammat siulersuisut ataatsimoorlutik pineqartutut pisinnaasaqarnissaat, taamaalillunilu aalajangersakkap piumasarinngimmagu siulersuisunut ilaasortat ataasiakkaat aalajangersakkami eqqaaneqartunik tamanik pisinnaasaqarnissaat. Taamaammatt pissutsit apeqqutaatillugit aammattaq periarfissaqassaaq, inunnik pineqartutut pisinnaasaqanngikkaluanik toqqaanissaq, naammappoq siulersuisut ataatsimoorlutik pisinnaasat pineqartut pigippatigik.

Aammattaq Sulisartut Højskoliata siunnersuutigaa, siunnersuummi § 9, imm. 5-imi taaneqartut ataatsimiititaliat, siulersuisut namminneerlutik pilersissinnaasaasa aningaasalersorneqarnissaat Namminersorlutik Oqartussanit qularnaarneqassasoq. Tassunga atatillugu højskolip taavai ataatsimiititaliani ilaasortaajumaartut angalanerinit aningaasartuutit, siunnersorteqarnissaq, iliniartitsisut amerlanerit il.il. Oqaaseqaat ilalernerneqanngilaq, tassami aalajangersagaq ataatsimiititalialiornissamik pissusaaffiliinngilaq, taamaallaalli siulersuisuni suliat aaqquissuunnissaannut periarfissaq allaaseralugu, taamatullu tamanna pillugu aalajangiinissaq siulersuisut namminneq isumagisussaavaat.

Sulisartut Højskoliata aamma Knud Rasmussenip Højskoliata aamma eqqaavaat, suliasat amerlanerit siunnersuutip nassatariumaagai aallaavigalugit kissaatiginartillugu atorfinitsitsinermit akissarsiatigullu atugassarititaasut naleqqussarneqarnissaat, ilaatigut

nutaanik atorfinitsitsinernut naleqqiullugu. Tassunga tunngatillugu oqaatigineqassaaq, isumaqatigiinniartarnernut tunngasut siunnersuutip sammisaasa avataanniimmata, taamatullu kissaatigineqarani ilinniartinnut Namminersorlutik Oqartussat aningaasalersugaannut allanut naleqqiullugu sulisoqarnermut pissutsitigut assigiinngisitsisoqarnissaa.

Sulisartut Højskoliata aammattaaq kissaatigaa siunnersuummi tusarniaassutigineqartumi § 16, imm. 2-mi sapaatip-akunneri 40-t taaneqartut 36-nngortinneqassasut. Tassunga tunngatillugu oqaatigineqassaaq, siunnersuummi tusarniaassutigineqartumi § 16, imm. 2-mi oqaasertaasut peerneqarmata. Qulaani eqqaaneqartutut aalajangersakkat taxameteri malillugu naatsorsuisarnermut tunngasut aamma pisinnaatitsilerfiusumik ilinniartitsinermut atatillugu tunngaviusumik tapiissutinut tunngasut peerneqarput, tamatumani siunertaralugu tapiissutinut atatillugu apeqqutit aalajangerneqartassasut, ilinniartitsinerup ilinniartimmil il.il. nalinginnaasumik ilinniakkamik pineqartumik neqerooruteqartartumi ingerlanneqarnermini tapiissutisarisagaanut naleqqiullugu. Taamaammat aammattaaq sapaatip-akunneri aalajangersimasut allaqqagaluartut siunnersuummi matumani peerneqarput.

Aammattaaq Sulisartut Højskoliat isumaqarpoq, siunnersuummi tusarniaassutigineqartumi § 16, imm. 3-mi "nutaat" peertariaqartoq. Oqaaseqaat ilalerneqarpoq, tassami folkehøjskolinit nutaanut innersuussineq pisariaqanngitsutut nalilerneqarpoq, folkehøjskolit nutaat malittarisassat aningaasaliisarnermullu atugassarititaasut pioreersunut atuuttut ingerlaannaq malerualersussaavaat.

Pineqartut saniatigut aammattaaq Sulisartut Højskoliata eqqaavaa, taxameteri malillugu aaqjissuussinermut atatillugu aningaasartuutiivit matussuserneqarnissaasa qularnaarnissaat, taamatullu eqqaaneqarput assersuutigalugu siunnersuinernut, siunnersortinit ikiorserneqarnermut kiisalu højskolip § 9, imm. 5-imut qulaani oqaaseqaataani eqqaaneqartunut atatillugu aningaasartuutit. Tassunga atatillugu oqaatigineqaannassaaq ingerlassat aallaavigalugit aningaasaliisarneq sallerpaatillugu ilinniartut amerlassusaannut attuumassuteqarmat, taamatullu siunnersuutip naatsorsuinissamut periusissaq eqqoqqissaartoq isummorsorfiginngimmagu, tamannalu aningaasartuutit, ilinniakkap højskolimi ingerlanneqarluni akiata, ilinniartimmilu nalinginnaasumik neqerooruteqartartumi ingerlanneqartuuguni akigisassaasa assigiittussaanerannut sanilliunneqassaaq.

Kiisalu forstanderit, ilinniartitsisut siunnersortillu pikkorissartarnissaannut aningaasaliisoqarnissaa kissaatigineqarpoq, taamatullu Knud Rasmussenip Højskoliata kissaatigivaa folkehøj-skolip sulisui pikkorissarnerit aqutugalugit siunnersuutip periarfissarititaanik piviusunngortitsinissamut piukkunnarsarneqassasut. Ilutigisaanik kissaatigineqarpoq siunnersortinit ikiorserneqartarnissaq. Tamanna ilalerneqanngilaq, tassami siunertaanngilaq Namminersorlutik Oqartussat folkehøjskolit sulisuisa assigiinngitsut pikkorissarnerinut akiliinissamut pisussaaffilerneqarnissaat. Taamaattoq sanilliunneqassaaq, siunnersuummi § 17, imm. 1 naapertorlugu, folkehøjskolit ilinniartitsisuisa forstanderiisalu ilinniaqqinnerinut tapiinissaq periarfissaqarmat. Tassunga ilannguttariaqarpoq siunnersuutip tunngaviginngimmagu, folkehøjskolit siunnersuutip akuerineqarneratigut pisinnaatitsilerfiusunik ilinniartitsinissamut periarfissat piviusunngortinnissaannut pisussaaffilerneqarnerat. Tamannami folkehøjskolit namminneq isummerfigisussaavaat, tamatumunnga ilanngullugit qanoq annertutigisumik siunnersuummi periarfissat atorumaneqarnerisut.

Ilutigisaanik Knud Rasmussenip Højskoliata kissaatigaa, tamannalu aamma Sulisartut Højskoliata ilanngullugu allakkaminni kissaatigalugu, akiitsutik, hypotekslånit ilanngullugit, isumakkeerneqassasut, taamatullu siunertanut assigiinngitsunut amerlanernik

anigaasaliiffigineqarnissartik, tamatumunnga ilanngullugit ataatsimoorussamik nalunaarsuiffiliornissamut anigaasaliissutit, tamannali siunnersuummut matumunnga toqqaannartumik attuumassuteqanngilaq. Tamatumunnga atatillugu Sulisartut Højskoliata aammattaaq piginnaangorsaaqqinnermi suliniutinik aallartitsisinnaanermut tunngasut apeqqutigivai, tamannali folkehøjskolit namminneq aalajangiiffigisussaavaat, tassami siunnersuut folkehøjskolit suliniutinik taamaattunik aallartitsinissaannik naalakkiinngilaq.

Saniatigut højskolit tamarmik ilinniarfiit allinissaannik kissaateqarput, taamatullu Knud Rasmussenip Højskolia ilinniartunut inissiat pilersinissaannut periarfissinneqarnissamik kissaateqarluni, soorlu utaqqiisaasumik containerinik ilinniartunut inissaqartitsigallarnikkut. Kissaatigisanut taaneqartunut naleqqiullugu pisariaqarpoq erseqqissassallugu siunnersuut pingaarnertigut aalajangersakkanik tigussaasunik imaqarmat, folkehøjskolit - tamanna pillugu isumaqatigiissuteqareernikkut - ilinniakkanik pisinnaatitsilerfiusunik neqeroorsinnaalernissaannut periarfissiisunik. Taamaammat siunnersuutip siunertarinngilaa pissutsit allat anigaasaqarnermut tunngasuunerusut ilanngunnissaat, taakku folkehøjskolit siunertaasa annertusinerannut toqqaannartumik attuumassuteqanngippata, aammami siunnersuut imminermini folkehøjskolit ilinniakkanik pisinnaatitsilerfiusunik aallartitsinissaannut pisussaaffiliinngilaq.

Sulisartut Højskoliata aammattaaq folkehøjskolersimanermut uppersaatiip ilinniartut ilinniaqqinnissaannut naleqqiullugu qanoq pingaartiginera apeqquserpaa, tassungalu oqaatigineqassaaq uppersaatiip siunnersuummi pineqartoq tassaammat ilinniartup højskolimi ilinniartuusimanagera uppersarsarniarlugu atugassaaq. Aalajangersakkami pineqanngillat assersuutigalugu soraarummeersimanermut, misilitsissimanermut assigisaannullu uppersaatiip, tassami uppersaatiip taamaattut allakkut malittarisassiorneqarnikuupput, tassalu malittarisassat pisinnaatitsilerfiusumik ilinniartitsinermit attuumassuteqartut aqutigalugit. Kisianni folkehøjskolit namminneerlutik ilinniartitsinerit ilinniarfinni il.il. allani ingerlanneqanngitsut ingerlanneqarsimaneri uppersaasertassavaat, tamatumani assersuutigalugu pineqarsinnaavoq ilinniartitsineq siunnersuummi § 1, imm. 2 naapertorlugu ingerlanneqartoq.

Tamakku saniatigut Knud Rasmussenip Højskoliata siunnersuut nuannaarutigaa, taamatullu toqqissisimanartillugu folkehøjskolit folkehøjskolit ilisarnaqutaat attatiinnarniarneqarmat ilutigisaanillu innuttaasut ilinniagaqassusiannik annertusaanermut peqataasinnaallutik, tamannalu højskolip siulersuisuisa tanngassimaarutigaa. Taamaattoq ilutigisaanik Knud Rasmussenip Højskoliani siulersuisut tikkuarumavaat, siunnersuut unaminartorpassuaqarmat, taamaammallu siunnersuummi pissutsit pisinnaatitsilerfiusumik ilinniartitsisinnaanermut tunngasut neqeroorutiginnissaannut ukioq ataaseq periarfissariumeqarluni.

Aammattaaq siulersuisut kissaatigaat folkehøjskolit inunnik assersuutigalugu isumaginninnermi siunnersortitut assigisaanilluunniit ilinniarsimasunik atorfinitsitsinissamut tapiisoqartassasoq, ilinniartut sanngiinnerusut pisariaqartitaannik isumaginnittussanik. Tassunga atatillugu eqqaamaqquneqarpoq, folkehøjskolit siunnersuut akuerineqassappat pisinnaatitsilerfiusumik ilinniartitsinissamut periarfissat annertusinerinik piviusunngortitsinissamut pisussaaffeqalissanngimmata, tassami folkehøjskolit namminneq aalajangissavaat periarfissat atorumanerlugit qaqugukkullu taamaaliorumanerlutik. Tamakku saniatigut folkehøjskolit tapiiffigineqarnissamut periarfissat pioresut atorsinnaajuassavaat.

Aammattaaq Knud Rasmussenip Højskoliata kissaatigaa, siunnersuummi siunertaq pillugu aalajangersakkami § 1, imm. 1-imut oqaaseq "demokratiskiusumik" ilanngunneqassasoq, tamatumunngalu pissutaavoq paasineqarsimammat annermik innuttaasut inuusuttut arlaqartut politikkimik soqutigisaqanngitsut, taamatullu folkehøjskolit inuiaqatigiinni ilinniarsiuppupput, taamaammallu folkehøjskolernerimi inuiaqatigiit ingerlanerat oqaluttuarisaanerallu sammisariaqarmata. Tassunga ilassutitut oqaatigineqarpoq inuiaqatigiit pisariaqartikkaat "inuit eqeersimaartut isummorsinnaasullu", tamannalu folkehøjskolit peqataaffigisariaqaraat.

Naak folkehøjskolit pingaartitamikkut tunngaviisa qitiusumiit aalajangersaaviginissaat tunngaviatigut nangaanartoqartinneqaraluartoq, oqaaseqaat ilalernerqarpoq. Tamatumunnga pissutaavoq demokratiimut tunngasut tassaammata sumiluunniit atuuttut inuiaqatigiinnut folkehøjskolit peqataaffigisaannut tunngaviusumik pingaaruteqartut. Taamaattoq oqaaseqaatip ilalernerqarnerata folkehøjskolit namminersortuunerat namminnerlu pingaartitaminnik aalajangersaasinnaanerat attunngilaa, tamannalumi aamma Knud Rasmussenip Højskoliata naammagisimaarlugu oqaatigaa.

Aammattaaq Knud Rasmussenip Højskoliata siunnersuutigaa folkehøjskolini forstanderit marluusinnaanerat periarfissinneqassasoq, suliassat annertusinerat eqqarsaatigalugu. Tamanna siunnersuummut ilanngunneqanngilaq, tassami siunnersuutip suliarinerani forstanderit marluulernissaat piumasaanngilaq. Tassunga ilanngunneqassaaq folkeshøjskolit namminneq - suliffeqarfittut imminnut pigisutut - aalajangertussaammassuk suliassat naammassinissaat qanoq aaqqissuunniarnerlugu, taamatullu siunnersuutip folkehøjskolit suliassaminnik amerlisaaqullugit peqqunngilai, taamaallaalli periarfissaliilluni.

Tamatuma saniatigut Knud Rasmussenip Højskoliani siulersuisut eqqaavaat, ilinniartinnik naleqquttunik isumaqatigiissuteqarnissamut periarfissarissarlutik, ilinniartitsinnermut periarfissat siunnersuutip eqqartugaasa piviusunngortinnissaat siunertaralugu, taamatullu pisortat suliffeqarfiutaannik anginerusunik arlalinnik eqqaamioqarput, qularnanngitsumik suleqatigineqarsinnaasunik.

Aammattaaq Knud Rasmussenip Højskoliani siulersuisut isumaqarput, siunnersuummi ersittariaqartoq ulluinnarni ingerlatsinnermut ataatsimiititaliaq (forretningsudvalg) atorfinitsitsinerni soraarsitsinernilu peqataatinneqartassasoq isumasiorneqarlunilu. Tamanna siunnersuummut ilanngunneqanngilaq, tassami ulluinnarni ingerlatsinnermut ataatsimiititaliaq siulersuisut ilagaat, taakkualu sulianut aalajangersimasunut atatillugu qanorpiaq suleriaaseqarnissartik namminneq aalajangissavaat, aammattaaq folkehøjskolip nammineq aalajangersagaq tamanna kissaatigineqarpat ileqqoreqqusaminut ilanngussinnaavaa.

Knud Rasmussenip Højskoliata eqqaavaattaaq, ilinniartut inaarutaasumik misilitsinnerit tunngavigalugit ilinniagaqarnersiaqartinneqartariaqartut. Tassunga tunngatillugu oqaatigineqassaaq, siunnersuummi § 20, imm. 1 naapertorlugu ilinniartut folkehøjskolimiittut ilinniagaqarnersiaqarsinnaammata, Namminersorlutik Oqartussat ilinniagaqarnersiaqarneq pillugu nalunaarutaanni piumasaqaatit piviusunngortikkunik.

Knud Rasmussenip Højskoliata saniatigut siunnersuutigaa, siunnersuutip misileraanermut aalajangersagaa § 22 naapertorlugu ingerlatsinissamut aningaasaliisoqassasoq, folkehøjskolit ingerlatsinnerminnik inerisaanissaat siunertaralugu. Tamanna ilalernerqanngilaq, tassami oqaaseqaat sallerpaatillugu aningaasanut inatsimmut tunngasuvoq, aamma

misileraasinnaanermik aalajangersakkami assersuutigalugu pineqarmata siunnersuummi aalajangersakkat tigussaasut aalajangersimasut.

Kommuneqarfik Sermersuup akissummini - Qeqqata Kommuniata akerlianik - inatsisissatut siunnersuut nalinginnaasumik ilassilluarpa. Tassunga atatillugu kommunip oqaatigaa, siunnersuut Namminersorlutik Oqartussanut kommunillu aningaasaqarnikkut sunniuteqassanngitsutut ilimagineqartoq, tassami siunnersuutip tunngaviusumik sinaakkuserpa, folkehøjskolit ilinniartinnik allanik pisortanilluunniit isumaqateqarenermikkut ilinniakkani pioreersuni holdinik ilassutaasunik neqerooruteqarsinnaanerit imaluunniit ilinniakkanik pikkorissarnernilluunniit nutaanik inerisaasinnaanerat.

Kisianni aamma kommunip kissaatigaa, Namminersorlutik Oqartussat pisariaqarfiatigut illuutit, atortut il.il. naleqqussarnissaannut pilersinnissaannulluunniit aningaasatigut tapiinissamut pisussaaffilertariaqaraluartut. Tassunga atatillugu uteqqinneqassaaq, siunnersuutip taamaallaat folkehøjskolit siunertaata annertusinissaa tigussaasutigut malittarisassiormagu, taamaammallu assersuutigalugu ilinniartinnik allat isumaqatigiissuteqarfigalugit periarfissanik siunnersuutip ammaasaanik atuinermi pilersitsinermut aningaasartuutaajunnartut pillugit piumasaqaatinik imaqarani. Taamaammatt pisariaqartitanut Kommuneqarfik Sermersuup taasaannut aningaasaliinissamut tunngasut, immikkut apeqqutaapput, Inatsisartut soorunami aningaasanut inatsimmik suliaqarnermut atatillugu ilanngullugit eqqarsaatigiumasinnaasaat.

Aammattaaq Kommuneqarfik Sermersuup eqqaavaa, assigiimmik pisussaaffiliisumik agguassinermit tunngaveqartoqartariaqartoq, tassami kommunini ataasiakkaani illoqarfinni arlalinni folkehøjskolinik pilersitsinissaaq pisariaqartinneqalersinnaavoq. Tassunga atatillugu kommunip ilassutigaa, meeqqat atuarianni atuartitsineq, pisinnaasanik inerisaaneq ilinniartitsinerillu Naalakkersuisut suliarigaat, taakkunanngalu kommuninut neqerooruteqartartuullutik. Tassunga atatillugu eqqaaneqassaaq, siunnersuut folkehøjskolit nutaat pilersinnissaat pillugit piumasaqaatinik imaqanngimmat taamaammallu oqaaseqaat siunnersuutip imminermi suliarinissaanut naapertuuttuunani. Aammattaaq ilannguneqarsinnaavoq meeqqat atuariat kommunit Naalakkersuisutulli annertutigisumik susasaqarfigimmasuk, tak. meeqqat atuariat pillugu peqqussut atuuttoq.

Inatsisissatut siunnersuutip aalajangersagaanut ataasiakkaanut oqaaseqaatit

§ 1-imut

Aalajangersagaq Inatsisartut peqqussutaata atuuttup siunertaanik ilaatigut ingerlatitseqqiineruvoq, tak. Folkehøjskolit pillugit Inatsisartut peqqussutaanni nr. 9, 21. maj 2002-meersumi § 1. Siunnersuutip ilinniarfiit amerlanerit pisinnaatitsiffiulersunik ilinniartitsisinnaalernissaat pingaarnertut siunertarimmagu, siunnersuutigineqarpoq siunertatut aalajangersakkat annertusinissaat, taamaalilluni folkehøjskolit aamma maannarnit annertunerusumik ilinniartitsinernik pisinnaatitsiffiulersunik neqeroorsinnaalersillugit.

Imm. 1-imut

Siunnersuummi § 1, imm. 1 pingaarnerusutigut Inatsisartut peqqussutaanni atuuttumi § 1-imik ingerlatitseqqiineruvoq, tasanilu oqariartuutaalluni ileqqusut malillugit folkehøjskolertitsisarnermi nalinginnaasumik peroriartuutaasumik ilinniartitsineq pingaartumik inissisimasoq. Aalajangersakkap malitsigaa pisinnaatitsilerfiusumik ilinniartitsinerit aallartinnissaannut periarfissap folkehøjskolit nalinginnaasumik peroriartuutaasumik ingerlatsinerat eqquassanngikkaat.

Aalajangersakkap qularnaassavaa, folkehøjskolit kulturimut, ilinniartitsinermut ilisimatusarnermullu tunngasut iluanni innuttaasunut ilinniartitsinermik nalinginnaasumik peroriartuutaasumik neqeroorsinnaanerit, taamatullu ilinniarfiit ilinniartitsinermikkut nalinginnaasumik innuttaasunik qaammarsaanermut peqataassallutik.

Tassunga atatillugu nalinginnaasumik peroriartuutaasoq paasineqassaaq tassaasoq, folkehøjskolit innuttaasut ilisimasaminnik annertusaanissamut periarfissinneqarnissaat qularnaassagaat, tasanilu nalinginnaasumik peroriartuutaasumik ilinniartitsinerup aalajangersimasumik pisinnaatitsiffiulersumik ilinniartitsineq illuatungeraa.

Nalinginnaasumik peroriartuutaasoq oqaatsit aammattaaq attuumassuteqarpoq perorsaanermut aamma ilinniartitsinermut, perorsaanermullu tunngatillugu oqaaseq pissuserinnermut ineriartornermullu attuumassuteqartinneqartarluni, tamatumani pineqartarluni inuup silappaarissutsimigut, misigissutsimigut, inooqataanikkut timikkullu ineriartorneranik siuarsaaneq. Aammattaaq eqqaaneqarsinnaavoq nalinginnaasumik peroriartuutaasumik ilinniartitsinermi ilinniartut ilinniartitsinermut peqataanerminni amerlanertigut aalajangersimasunik assigiinnilluunniit anguniagaqartanngimmata, taamatullu nalinginnaasumik aalajangersimasunik uuttorneqarsinnaasumillu ilikkagaqarnissaq qitiutinneqartarani.

Aammattaaq aalajangersagaq atuuttoq nalinginnaasumik peroriartuutaasumik atuartitsinermut tunngatillugu oqaatsimik “demokratiskiusumik” ilaneqarpoq, tamannalu pivoq Knud Rasmussenip Højskoliata tusarniaanermut akissutaa naapertorlugu, tak. Nalinginnaasumik oqaaseqaatini imm. 7 siunnersuutip tusarniaassutigineranut tunngasoq. Ilassuteqarnermut pissutaavoq demokratiimut tunngasut tassaammata inuiaqatigiinnut folkehøjskolit atuuffigisaannut nalinginnaasumik pingaaruteqarlutik tamani atuuttuummata.

Aalajangersakkami folkehøjskolit namminneq toqqakkaminnik pingaartitaannut atatillugu, tamanna isiginiartariaqarpoq folkehøjskolit perorsaanikkut isummanik imaluunniit isiginneriaatsinik assigiinnigitsunik toqqammaveqarsinnaanerannut naleqqiullugu, ilinniarfiit ataasiakkaat perorsaanikkut suleriaatsimikkullu tunngavigisinnaasaannik, naak ilinniarfiit

ataatsimut isigalugu nalinginnaasumik peroriartuutaasumik ilinniartitsinissamik aallaaveqaraluartut.

Tassunga atatillugu ersersittariaqarpoq, siunertarineqanngimmat ilinniartut folkehøjskolit namminneq toqqarlugu pingaartitaat pigiliutissagaat, kisiannili ilinniartut namminneq namminnerisaminnik pingaartititik aallaavigalugit namminneerlutik pingaartitaminnik oqaasertaliisinnaalernissaat siunertarineqarluni.

Aammattaaq aalajangersakkami naggatit aappaanni ersippoq, folkehøjskolit nalinginnaasumik peroriartuutaasumik ilinniartitsisussaagalarlutik, atuartitsissutit ataasiakkaat imaluunniit atuartitsissutit ataatsimoortut pingaarnerutillugit inississinnaagaat, siunertap pingaarnerup - tassalu nalinginnaasumik peroriartuutaasumik ilinniartitsinissap - iluani.

Tamatuma nassatarivaa folkehøjskolit neqeroorutigisinnaammatigit folkehøjskolernerit, assersuutigalugu atuartitsissutit nipilersornermut, timersornermut eqqumiitsuliornermulluunniit tunngasut siunertamut pingaarnermut - nalinginnaasumik peroriartuutaasumik ilinniartitsinissamut naleqqiullugu sallitinneqarfii.

Imm. 2-mut

Aalajangersagaq inatsisinut atuuttunut naleqqiullugu nutaaliornervoq. Aalajangersakkap qularnaassavaa folkehøjskolit ilinniartitsinernik pisinnaatitsilerfiusunik neqerooruteqarsinnaanerat, atuartitsissutit mernguernartut pilersitsiffiusullu iluini. Tamatumani assersuutigalugu eqqarsaatigineqarput ilusilersuineq, sananeq, nipilersorneq, isiginnaartitsineq, qitinneq, rytmikki, assassorneq il.il.

Aammattaaq siunnersuutip anguniarpaa maanna arnat ilinniarfiata ingerlatiinnarnissaanut inatsitigit tunngaviliinissaq, tassani ilinniarneq maanna Knud Rasmussenip Folkehøjskolianit neqeroorutaavoq, Inatsisartut peqqussutaanni maanna atuuttumi misileraasinnaanermut aalajangersagaq tunuliaqutaralugu. Taamaaliornikkut Arnat Ilinniarfiata ingerlassai ataavartunngortinneqarsinnaapput.

Ilinniartitsinerup pisinnaatitsilerfiunissaanik piumasaqaammut naleqqiullugu pineqartoq tassaavoq, ilinniartitsinerup nalinginnaasumik peroriartuutaasunik ilinniartitsinermi nalinninnaasumik piumasarineqartartunit annertunerusunik ilinniartoq piginnaasaqalersissagaa.

Saniatigit pisinnaatitsilerfiusumik ilinniartitsineq atorneqarsinnaassaaq sulilernissamut imaluunniit allamik ilinniagaqalernissamut tunngavissatut. Aalajangersakkap imminermini ilinniartitsinerup neqeroorutigineqartussap imarisassai malittarisassiunngilai, tamannami naatsorsuutigineqarpoq pissasoq ilinniartitsinermut pilersaarutit aqutigalugit, taakku folkehøjskolit suliarissavaat Naalackersuisunit akuerineqartussanngorlugit, imaappoq ulluinnarni Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmit.

Imm. 3-mut

Aalajangersagaq nutaajuvoq siunertaralugulu meeqqat atuarfianni inaarutaasumik naliliinerit peqataaffiginissaat ilinniartitsinerit, ilinniakkami allami ilinnialissutaasinnaasumik ilinniartitsinerit aamma ilinniarnertuunngorniarni atuartitsissutaasartunik ilinniartitsinerit ataasiakkaat imaluunniit tunngaviusumik inuutissarsiutinik ilinniartitsinerit neqeroorutigineqarsinnaanissaannut erseqqissumik inatsisitigit tunngavissiiinissaq.

Ilinniakkami allami ilinnialissutaasinnaasumik ilinniartitsineq ima paasineqassaaq folkehøj-skolite aalajangiussinnaagaat ilinniakkani aalajangersimasuni ilinnialernissamut piumasaqaataasut nalingannik qaffasissuseqartumik ilinniartitsiumallutik.

Tamatumani assersuutigalugu pineqarsinnaapput perorsaasutut tusagassiortutulluunniit ilinniakkanut piareersarnerit ilinniakanilluunniit aalajangersimasuni allani ilinnialernissamut piareersarluni ilinniarnert, tamatumunngalu atatillugu piumasaqaataassaaq, ilinniartitsinerup ilinniarnert pineqartoq ilinniarnikkullu piareersarfigineqartussa quleqatigalugu ingerlanneqarnissaa, erseqqinnerusumik tak. § 1, imm. 4.

Aalajangersakkap aammattaaq inatsisitigut tunngavississinnaavaa ilinniartitsinerit sivikinnerusut neqeroortigineqarsinnaanerit, soorlu ilinniarsimannigitsunik piginnaangorsaalluni pikkorissaanerit (PKU) imaluunniit inuutissarsuutit ilinniartitsinermit pikkorissaanerit akuerisaasut (AEU), taamalu pisoqassappat Piareersarfiit quleqatigineqarsinnaapput, tak. aalajangersakkami imm. 4.

Meeqqat atuarfianni inaarutaasumik naliliinernut aalajangersakkamilu ilinniakkanut allanut taaneqartunut tunngatillugu, piumasaavoq ilinniartitsineq assersuutigalugu meeqqat atuarfianni, ilinniarnertuunngorniarnertim imaluunniit qitiusumik inuutissarsuutit ilinniarnertim nalinginnaasumik piumasaqaataasartunut nallersuussinnaassasoq.

Taamaalilluni ilinniartitsinerup folkehøjskolimi ingerlanneqarnerata nassatarinngilaa, ilinniartitsinermit piumasaqaataasut allannertinneqarnerat. Allatut oqaatigalugu ilinniartitsineq minnerpaamik assersuutigalugu meeqqat atuarfianni ilinniarnertuunngorniarnertim ilinniartitsinertulli pitsaassuseqassaaq, folkehøjskolite namminneerlutik ilinniartitsinermit ilusilersuisinnaanerit periarfissat killilersunnigikkaluarlutik.

Aalajangersakkami naggatit siulliat naggataani ilinniartitsinerup malittarisassat atuuttut naapertorlutik ingerlanneqarnissaanik piumasaqaat sallerpaatillugu ilinniartitsinermit pilersaarutit ilinniakkamut pineqartumut atuuttunut tunngavoq. Taamaalillutik folkehøjskolite ilinniartitsinertut pineqartut neqeroortiginissaannut periarfissaqarput, aammali pisussaaffigalugu ilinniartitsinerup ilinniartitsinermit pilersaarutit allaqqasunut naapertuuttuunissaa. Taamaammat ilinniartitsineq aqqissuunneqassaaq, ilinniartit ilinniakkami pineqartumi qaqugukkulluunniit piumasaqaataasumik piviusunnertitsisinnaangorlugu.

Imm. 4-mut

Aalajangersakkami aalajangerneqarpoq meeqqat atuarfianni inaarutaasumik naliliinissaaq, ilinniakkami allami ilinnialernissaaq, tunngaviusumik inuutissarsuutit ilinniartitsinerup iluani ilinniagaqarnissaaq aamma ilinniarnertuunngorniarnertim atuartitsissuutit ataasiakkaanik ilinniagaqarnissaaq siunertaralutik ilinniartitsinermit pisinnaatitsilerfiusunik neqeroorteqarsinnaanissamut piumasaqaataasooq ilinniarnertim imaluunniit oqartussaasumik ilinniakkamit nalinginnaasumik neqeroorteqartartuusumik isumaqatigiissuteqarsimanissaaq.

Assersuutigalugu tuluit oqaasii ilinniarnertuunngorniarnertim killiffiusartup nalingatut ilinniartitsissutigineqassappata, piumasaavoq ilinniarnertuunngorniarnertim ilinniarnertim allamik qaffaseqataamik ilinniartitsisartumik quleqateqarnissaaq. Aalajangersagaq tunuliaqutaralugu pitsaassuseq aalajangersimasooq qularnaarneqassaaq,

taamatullu suleqatigiinnissamik isumaqatigiinnermi piunasaavoq, folkehøjskolip ilinniartimmut il.il. pineqartumut ilinniartitsissummut tunngatillugu imarititaasussat allaaserissagai pisariaqarpallu uppernarsassagai.

Ilutigisaanik suleqatigiinnissamik isumaqatigiissut ilinniartitsinermit pilersaarutini Naalackersuisunut akuerisassatut nassiunneqartussani ilanngunneqassaaq, tak. § 9, imm. 4 aamma § 15, imm. 2. Aammattaaq suleqatigiinnissamik isumaqatigiissummut ilaassapput, inaarutaasumik naliliinerit, misilitsinnerit soraarummeernerilluunniit pillugit apeqqutinut tunngatillugu aalajangiussat, erseqqinnerusumik tak. siunnersuummi § 4, imm. 2.

Ilutigisaanik aalajangersakkap periarfissippaa, assersuutigalugu ilinniarnertuunngorniarfiup atuartsissuummi ataatsimi ilinniartitsinermit folkehøjskolimut nuussinissaa, taamaalillunilu atuartsissuummik taassuminnga ilinniartitsineq ilinniartut sapaatip-akunnerinut tiimiinut ilanngunneqarsinnaalluni. Suleqatigiinneq aammattaaq ima pisinnaavoq, suleqatigiinnissamik isumaqatigiissuummi malittarisassiuunneqarluni folkehøjskolerneq ilinniakkamut pineqartumut naleqqiullugu sivikillisaataasinnaasoq.

Suleqatigiinnissamik isumaqatigiissutit ilinniartup ilinniarnernik folkehøjskolernemillu akuleriissitsiffigisai ilaatigut takorloorneqarsinnaapput atorneqassasut, ilinniartup allanik avatanngiiseqarluni ilinniarnissaa pisariaqartinneqartutut nalilerneqarpat, folkehøjskolimiinnerlu ilinniartumut kaammattuutaallunilu inuttut iluaqutaasinnaappat.

Tamatumani piunasaavoq, folkehøjskolip pineqartup ilinniakkat ilinniartinni pioreersuni akiusut assingannik akeqartitsilluni neqeroortigissagai, aamma tak. ataani § 16, imm. 1-imut oqaaseqaatit. Taamaalilluni inatsit Nunatta Karsianut aningaasartuuteqarnerunermik nassataqassanngilaq, ilinniartinni pioreersuni ilinniakkani assigiinni holdinik pilersitsinermit naleqqiullugu, ingerlassap pineqartup ilinniartinni pioreersumi ingerlanneqartussaagaluaq taarserpagu. Aammattaaq siunnersuutip aningaasatigut kinguneriumaagaanut oqaaseqaatit innersuunneqarput.

Naalackersuisut suleqatigiinnissamik isumaqatigiissuummik akuersisussaanerannut, tak. aalajangersakkami naggatit aappaat, tunngaviuvoq Naalackersuisut ilinniartitsinermit tunngasut aaqqissuunnerisa siunertamut naapertuuttuunerannut qullersaallutik akisussaammata. Tamanna aammattaaq attuumassuteqarpoq, folkehøjskolini ilinniakkap ilusaanik toqqaanissaq Naalackersuisunut suliaassaammata, ilinniakkap ilusaa, annertussusaa aningaasanullu tunngasut immikkut ittumik ilinniartitaanikkut suliniutinut aqutsisooqatigiinnit eqqarsaatigilluarneqarlutillu inassuteqaateqarfigineqareeraangata.

Imm. 5-imut

Siunnersuutigineqarpoq Naalackersuisut pissutsit § 1, imm. 1-4-mi taaneqartut pillugit nalunaarusiorlutik erseqqinnerusunik malittarisassiorsinnaatitaassasut. Aalajangersakkami tunngavissinneqarpoq assersuutigalugu nalinginnaasumik peroriartuutaasumik ilinniartitsinermit naleqqiullugu atuartsissutit ataasiakkaat imaluunniit atuartsissutit imminnut qanitariissut pillugit aalajangersagaliortoqarsinnaanera, akerlianilli aalajangersagaq folkehøjskolit namminneq toqqakkaminnik pingaartitaat pillugit aalajangersagaliornissamut atugassatut naatsorsuutaanngilaq. Tassami apeqqutip taassuma nassuiarnissaa folkehøjskolit namminneq isumagissavaat, taamatuttaaq aalajangersagaq nalinginnaasumik peroriartuutaasumik ilinniartitsinerup suuneranik nassuiaanissamut atorneqartussatut naatsorsuutigineqanngilaq.

Aammattaaq aalajangersagaq atorsinnaavoq pisinnaatitsilerfiusumik ilinniartitsinerit pillugit malittarisassanik aalajangersaanissamut - inatsisit allat malittarisassiaat ataqqillugit. Pisinnaatitsilerfiusumik ilinniartitsinerup assersuutigalugu imarisassai pillugit malittarisassiorsinnaanermut periarfissaq taamaalilluni taamaallaat atorpeqarsinnaavoq, pissutsinut ilinniakkami pineqartumi suli malittarisassiuunneqarsimanngitsunut tunngatillugu. Pineqartut saniatigut aalajangersagaq atorsinnaavoq, suleqatigiinnissamik isumaqatigiissutit § 1, imm. 4-mi pineqartut piumasaqaateqarfiginerinut tunngatillugu, tamatumunnga ilanngullugit ilusissaannut uppersaasersuinissamullu tunngasut.

§ 2-mut

Aalajangersagaq nutaajuvoq, siunertaralugulu folkehøjskolit ilinniartitsinermillu ingerlataqartut allat tassaasut ilinniartitsinerit allat, suliffeqarfiit imaluunniit oqartussaaffeqarfiit akornanni eqaatsumik suleqatigiinnissamut periarfissiinissaq. Aalajangersakkami imarisaasut piviusunnngortinnissaannut piumasaavoq, ilinniartitsinerit il.il. naapertuuttumik tamanna pillugu isumaqatigiissuteqarsimanissaq, tak. siunnersuummi § 1, imm. 4, aamma ilinniartitsinerit il.il. allami ingerlatsinissamik isumaqatigiissut tamatumunnga kingorna Naalakkersuisunit akuerineqassaaq, imaappoq ulluinnarni Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit.

Ilinniartitsinerit il.il. allami ilinniartitsinerit ingerlatsineq ima aqqissuunneqarsinnaavoq, folkehøjskolit ataasiakkaat inissaqassusiannut, ilinniakkap ilusaanut ilinniartitsinerimullu il.il. isumaqatigiissuteqarfigineqartumut naleqqussarneqarluni.

Tassunga atatillugu ilinniartitsineq, aalajangersagaq tunngavigalugu ilinniartitsinerimut il.il. allamut nuunneqarsinnaasoq killilerneqanngilaq. Taamaalilluni nuussineq nalinginnaasumik peroriartuutaasumik aamma pisinnaatitsilerfiusumik ilinniartitsinerimut atatillugu pisinnaavoq.

§ 3-mut

Aalajangersakkap naggataa siulleq Inatsisartut peqqussutaanni atuuttumi § 2-mi naggammik siullermik ingerlatitseqqiineruvoq. Aalajangersakkami naggat siulleq folkehøjskolit immikkut ilisarnaataannut tunngavoq, tassalu ilinniartitsineq pisarmat folkehøjskolernertut, nerisaqaatigaluni najugaqarfittut aqqissuussaasumik. Aalajangersakkap nassatarivaa, folkehøjskolit pisussaaffigimmassuk ilinniartunngortut inissaqartinnissaat. Aalajangersakkap ilutigisaanik ersersippaa folkehøjskolit tassaasut suliffeqarfiit imminnut pigisut, tak. § 8, imm. 1, tassami folkehøjskolit namminneerlutik ilinniartussatik akuerisarpaat.

Aammattaaq aalajangersakkap naggataata aappaani - Inatsisartut peqqussutaanni maanna atuuttumi § 2-mi naggatit aappaanik ilaatigut ingerlatitseqqiinerusumi - ersippoq, Naalakkersuisut nalunaarusiorlutik ilinniartitsinerit qinnuteqartitsinerimut ilinniartunngortitsinerimilu periusissat pillugit malittarisassanik aalajangersaasinnaasut. Kisianni nalunaarusit taamaattoq aatsaat pilersinneqarsinnaavoq folkehøjskolit oqaaseqaateqarteqqaarlugit, tamannalu ulluinnarni imaappoq, malittarisassiassatut pilersaarutaasoq folkehøjskolinut saqqummiuteqqaartariaqartoq, folkehøjskolillu oqaaseqaateqarnissaminut periarfissaqassasut. Taamaalilluni piumasaqaataannngilaq folkehøjskolit pinngitsoorutik oqaaseqaateqarsimanissaat.

Nalunaarusimut pineqartumi aammattaaq imaritinneqarsinnaapput ilinniartortaarinnissamut piumasaqaatit, ilinniartitsinerimut aalajangersimasumut peqataassagaanni ilinniartumut

piumasaqaataasut ilanngullugit. Tamatumani pineqarsinnaapput ilinnialernissamut piunasaqaatit ilinniartup siusinnerusukkut suliarisarsimasaasa nalilernerannik aallaaveqartut, aamma ilinniartorisinnaasat killilersornerat pillugu malittarisassat aalajangersarneqarsinnaapput.

§ 4-mut

Aalajangersagaq nutaajuvoq.

Imm. 1-imut

Aalajangersakkap naggataani siullermi aalajangerneqarpoq, folkehøjskolit pisinnaatitsilerfiusumik ilinniartitsinerat pissasoq nalinginnaasumik inatsisitigut maleruagassaajunnartut ilinniartitsinermut tunngasut ataqqillugit. Taamaalilluni siunnersuutip matuma ilinniakkat aalajangersimasut folkehøjskolini ingerlanneqarsinnaanerannik ammaassinerata, inatsisitigut allatigut piunasaqaataasut allanngortinngilai. Assersuutigalugu folkehøjskolip ilinniarnertuunngorniarfimmi atuartitsissutaasartunik ataasiakkaanik ilinniartitsiniarluni toqqassaguniuk, folkehøjskolip assersuutigalugu ilinniarnertuunngorniarneq pillugu inatsisit atuuttut maleruartariaqassavai.

Aalajangersakkami naggatit aappaanni siunnersuutigineqarpoq Naalackersuisut nalunaarusiornerminni folkehøjskoliinnissap Namminersorlutik Oqartussanit tapiiffigineqartup naammassineqarnissaata inatsisiliuunnissaanut piginnaatinneqassasut. Inatsisiliorterli tamanna aatsaat pissaaq malittarisassat ilinniartitaanernut assigiinngitsunut atuuttut ataqqillugit, takuuk aalajangersakkami naggatit siulliat. Aalajangersakkap, malittarisassani allani inatsisiliuunneqareersimanngitsup, atornissaa pilersaarutaanngilaq.

Imm. 2-mut

Aalajangersakkami ersippoq, ilinniartut pisinnaatitsilerfiusumik ilinniartitsinermut peqataasut inaarutaasumik naliliinernut, misilitsinnernut soraarummeernernulluunniit peqataanissaminnut periarfissaqassasut. Taamaalilluni pineqartoq tassatuaavoq inaarutaasumik naliliinermut, misilitsinnermut soraarummeernermulluunniit peqataanissamut pisinnaatitaaffik - pisussaataaaffiunngitsoq. Taamaalilluni ilinniartoq ilinniarnini inaarutaasumik nalilertinnermik naggasersinnaassavaa, ilinniartitsinermut meeqqat atuarfianni killiffiusup naleqqataanut peqataasimaguni. Ilinniartitsinerup inaarutaasumik naliliinermik, misilitsinnermik soraarummeernermilluunniit naggasernissaanut apeqqutaavoq ilinniartitsineq qanoq ittoq peqataaffigineqarsimanersoq, taannalu ilinniakkamut sumut attuumassuteqarnersoq. Taamaalilluni ilinniartoq ilinniakkami pineqartumi misilitsittussaassanngilaq, ilinniagaq pillugu malittarisassani ersippat ilinniagaq misilitsiffiussanngitsoq.

Aalajangersakkap isummerfiginngilaa inaarutaasumik naliliineq, misilitsinneq soraarummeernerluunniit folkehøjskolimi pissanersoq, tamannami aalajangerneqartariaqarpoq ilinniartik imaluunniit qullersaqarfik ilinniakkamut nalinginnaasumik oqartussaasoq suleqatigalugu, ersarinnerusumik tak. siunnersuummi § 1, imm. 4.

Taamaattoq tamatumunnga atatillugu oqaatigineqassaaq, misilitsinnermik soraarummeernernilluunniit ingerlatsinerit allaffissornikkut pisariusuummata, tamatumani apeqqutit assigiinngitsut isummerfigisariaqartarmata, soorlu maalaarsinnaaneremut, qitiusumi nalunaarsuiffinnut ilanngussinnaaneremut il.il. tunngassuteqartut, taamatullu misilitsinnermik soraarummeernernillu ingerlatsinerit aammattaq folkehøjskolip forständerianut avataaniit

piumasaqaatinik nassataqarsinnaapput. Tamatuma akerliattut eqqarsaatigineqassapput ilinniartut ulluinnarni ilinniartitsinermit sungiusimasaminnik avatangiiseqarlutik misilitsissinnaanerat, soraarummersinnaanerat il.il..

Pineqartut saniatigut siunnersuutigineqarpoq Naalakkersuisut ilinniartitsinerup naammassinissaanut tunngatillugu nalunaarusiorlutik aalajangersagaliornissaminut pisinnaatinneqassasut, inatsisit allat pissutsinik inatsisitigut malittarisassiuussisuusut ataqqillugit. Aalajangersagaq ilaatigut atorneqarsinnaavoq, inaarutaasumik naliliinerit il.il. sumi pisarnissaannut aalajangersaanermut, taamatuttaaq folkehøjskoli aalajangersimasunik piumasaqaateqarfigineqarsinnaavoq, inaarutaasumik naliliinerit il.il. folkehøjskolimi pisassappata. Tamatumani pineqarsinnaapput misilitsinnernut il.il. atatillugu atortutigut piumasaqaatit piumasaqaatillu immikkut ittut, tamatumunnga ilanngullugit sulisunit misilitsinnerni, soraarummeernerni il.il. ikiortasussanit piumasarisat.

Inaarutaasumik naliliinerup, misilitsinnerup soraarummeernerulluunniit ingerlannissaanut akisussaaffik qanoq inissisimassanersoq ilinniarfimmik oqartussaasunilluunniit ilinniakkamik nalinginnaasumik neqerooruteqartartuusunik isumaqatigiisummi ersissaaq, siunnersuummi § 1, imm. 3-mi ilinniartitsineq taaneqartoq pineqarpat. Siunnersuummi § 1, imm. 1 naapertorlugu inaarutaasumik naliliineq, misilitsinneq soraarummeernerluunniit pineqarpat akisussaaffik folkehøjskolimiissaaq.

§ 5-imut

Aalajangersagaq nutaajuvoq.

Aalajangersakkap ersersippaa ilinniartut pisinnaatitaaffigigaat, folkehøjskolimi ilinniartitsinermut peqataasimanermik uppersaasernerneqarnissaa. Aalajangersagaq folkehøjskolimiinnermut atatillugu ingerlassimasanut tunngavoq, kisiannili aallaavittut assersuutigalugu pineqaratik soraarummeernermut misilitsissimanermut assigisaannullu uppersaasat. Taakku malittarisassat allat, ilinniakkamut attuumassuteqartut, aqutigalugit maleruagassaqarput. Uppersaasat aamma ilusilernerneqarsinnaavoq pisinnaalikkanut allagartatut, pisinnaasat ilinniartup angusimasaasa allaaserineqarfiattut.

Aalajangersakkami naggatit aappaanni aammattaaq ersippoq, Naalakkersuisut nalunaarutitut ilusilikkamik folkehøjskolimiissimanerup uppersaasernissaanut atatillugu ilusissaa, imarisassai atuuffialu pillugit malittarisassanik aalajangersaasinnaasut, aamma assersuutigalugu uppersaasatitut ilaasinnaapput ilinniartup ilinniarnernik ingerlatsineranut tunngatillugu allaaserinninnerit.

§ 6-imut

Aalajangersagaq nutaajuvoq, siunertaralugulu ilinniartut folkehøjskolerneranni siunnersuinerup, tapersuinerup ilitsersuinerullu nukittorsarnissaat. Aalajangersakkami imm. 1 nalinginnaasumik siunnersuineq, tapersuineq ilitsersuinerlu pineqarput, imm. 2-milu ilinniartut ataasiakkaarlugit siunnersuineq il.il. pineqarluni.

Imm. 1-imut

Imm. 1-mi siunnersuutigineqarpoq aalajangersakkatut ilanngunneqassasoq, folkehøjskolip pisussaaffigissagaa ilinniartorisami ilinniarfimmi najugaqartuusut isumassornissaat. Aalajangersagaq isiginiarneqassaaq ilinniartut angerlarsimaffimminniinginnerannut

naleqqiullugu, taamaammallu ilinniartut immikkut tapersersorneqarlutillu isumassorneqarnissaat pisariaqarsinnaammat. Aalajangersakkamili pisussaaffik taamaallaat ilinniartut folkehøjskolimiinnerminnik naammassinninnissaannut naleqqiullugu siunnersuinnermut, tapersersuinnermut ilitsersuinnermullu tunngavoq. Tamatumani pineqarsinnaapput inuit arlaannik pissuteqartumik folkehøjskolimiinnerminnik ingerlatsiniapiloortut ilitsersorneqarlutillu tapersersorneqarnissaat.

Imm. 2-mut

Aalajangersakkami naggatit siullianni pineqarpoq folkehøjskolit ilinniartunik ataasiakkaanik isumassuinnissaminnut pisussaaffiat, ilinniartunik ataasiakkaanik siunnersuilluni ilitsersuillunilu oqaloqatiginnertut iluseqartumik. Taamaammat aalajangersakkap matuma imarisaa piviusunngortinneqarsinnaanngilaq nivinngaannikkut ataatsimoorluniluunniit ataatsimiinnertut, tassami piumasavaoq siunnersuineq il.il. atuartunut ataasiakkaanut tunngasuussasoq.

Tassunga atatillugu eqqaaneqassaaq, ataasiakkaaraluni siunnersuillunilu ilitsersuinissamut il.il. pisussaaffimmut apeqqutaassammat ilinniartut ataasiakkaat taama pisoqarnissamik pisariaqartitsinerat. Tamatuma saniatigut aalajangersakkami naggatit aappaanni ersippoq Naalakkersuisut nalunaarutitut ilusilikkamik ataasiakkaaraluni siunnersuineq, tapersersuineq ilitsersuinnerlu pillugit malittarisassiorsinnaasut, tamatumunngalu ilaapput siunnersuinnerup il.il. annertussusissaa ilusissaa il.il.

§ 7-imut

Aalajangersagaq nutaajuvoq siunertaralugulu folkehøjskolit nalinginnaasumik ilinniartitsinerup iluani, tak. § 1, immikkut aqqissuussamik suliniuteqarsinnaanerat erseqqissassallugu. Aalajangersagaq inuit allannermik atuarnermillu ajornartorsiuteqartut atuartitaasussaatitaajunnaareersullu, ullumikkut erseqqissumik neqeroorfigineqartannginnerannut atatillugu isiginiarneqassaaq.

Pineqartoq tassaavoq tapersiissutitut iliuuseqarneq, immikkut ingerlatsineq aalajangersimasumik ilinniartitsinertut immikkulluunniit ilinniartitsinertut aqqissuussinertut ilusiligaq pineqarani, tassami aalajangersakkap siunertaraa ersersissallugu, siunnersuummi § 1-imi ilinniartitseriaatsit taaneqartut ilinniartut immikkut pisariaqartitsinerat aallaavigalugu aqqissuunneqarsinnaasut.

Taamaalilluni tapersersuineq pissaaq ilinniartitsinerup pineqartup ingerlanneqarnera ilutigalugu, taamaalilluni ilinniartut pisariaqartitsisut, ilinniartutut nalinginnaasumik ilinniartinneqarlutik ingerlasutut ilisimasaqalerlutillu piginnaasaqaleqqullugit. Tamatuma nassatarissavaa ilinniartut nalinginnaasumik ilinniartitsinerup imarisaanik annaasaqannginnerat, tassami ilinniartoq pineqartoq nalinginnaasumik ilinniartitsinnermut peqataassaaq.

Taamaattoq aalajangersakkap akornusinnigilaa, folkehøjskolit immikkut aqqissuussamik ilinniartitsinernik nalinginnaasumik ilinniartitsinerup avataatigut piffissaliillutik aqqissuussisinnaanerat. Tamanna pisinnaavoq ilinniartup immikkut pisariaqartitsisup nalinginnaasumik ilinniartitsinnermut peqataanermi avataatigut, ilutigisaanik skemap nalinginnaasup avataatigut atuartitsissummi ataatsimi amerlanerniluunniit immikkut

tapersorsorneqarneratigut. Tamatuma saniatigut eqqaaneqassaaq folkehøjskolit aammattaaq periarfissaqarmata ilinniartitsinerup tamarmiusup, soorlu klassimi ataatsimi, immikkut aaqquissuussamik ilinniartitsinertut ingerlannissaanut. Tamatumani pineqarsinnaapput ilinniartut nalinginnaasumik ilinniartitseriaatsimi malinnaaniapiloortut, taamaammallu klassimi ataatsimi ilinniartinneqartut, assersuutigalugu misilitsinnissamut piareersarfiusumik ilinniartinneqarlutik, atuartitsissutit ilaanni meeqqat atuarfianni inaarutaasumik naliliinermut peqataanissaq siunertaralugu.

§ 8-mut

Aalajangersakkami imm. 1 Inatsisartut peqqussutaanni atuuttumi § 3-mik ilaatigut ingerlatitseqqiineruvoq, kisiannili assersuutigalugu siulersuisut toqqagaasarnerat, piginnaasariaqagaat piffissarlu atuuffiat pillugit peqqussut atuuttoq imaqaangilaq.

Imm. 1-imut

Aalajangersakkap pingaarnerusutigut Inatsisartut peqqussutaanni atuuttumi § 3 assigaa. Ilutigisaanik aalajangersakkap malittarisassat suliffeqarfinnut imminnut pigisunut nalinginnaasumik atuuttut assigai, taakku inatsitigut isigalugit tassaapput imminnut pigisut Namminersorlutik Oqartussat nalinginnaasumik ilitersuisinnaatitaaffiisa avataanniittut.

Tassunga atatillugu siunertamut naapertuuttut isigineqarpoq imminut pigisutut ilusiliisarnermut tamatumalu inatsisitigut paasinissaanut tunngatillugu oqaaseqaateqalaarnissaq. Suliffeqarfik imminut pigisup assigaa inuk inatsisitigut pisinnaatitaasoq pisussaatitaasorlu, ilisarnaatigaalu aningaasanik pigisaqarnini pilersitsisumiit utertinneqarsinnaanngitsumik avissaaqqasunik, ataatsimik amerlanernilluunniit siunertaqarnini, suliffeqarfiup ileqqoreqqusaani allaaserineqartunik, namminerisaminik aamma arlaannaannulluunniit attuumassuteqanngitsumik aqutsisoqarnini, piffissami sivisunerusumi ileqqoreqqusani aalajangerneqartumik atuuttussatut siunniussaqaarnini, aamma suliffeqarfiup suliffeqarfiit namminersortut assigalugit ukiumoortumik naatsorsuuserinermut inatsimmik malitaqarnera.

"Imminut pigisutut" taaneqarnissamut apeqqutaalluinnarpoq, suliffeqarfiup namminerisaminik aningaasaateqarluni ingerlanneqarnera allanullu attuumassuteqannginnera, tamatumani pineqartut tasaanerullutik pilersitsisut, kattuffiit, suliffeqarfiit allat, pisortat il.il. Suliffeqarfiup immineerluni inatsitigut suussusiligaanerata nassataraa, inatsisitigut pituttorfiusumik pisussaaffinnik tiguisinnaanera pisinnaatinneqarsinnaaneralu, taamatullu suliffeqarfik aalajangiussani pissutigalugit assersuutigalugu Nunatta Karsianik pisussaaffeqartitsilersinnaanani.

Soorlu folkehøjskolinut atuuttoq nalinginnaavoq suliffeqarfittut imminut pigisutut ilusiliinerup suliffeqarfiit tapiiffigineqarnerinut atatillugu atorineqartarnera, taamaalilluni tapiissuteqartuusoq taamaallaat suliffeqarfiup ingerlatsineranut tapiissuteqartarluni, suliffeqarfillu inatsisaajunnartut aningaasaliinermilu piumasaqaataasut iluanni tapiissutit atornissaannik nammineerluni aalajangersaasinnaalluni.

Naak suliffeqarfiit imminnut pigisut inatsisitigut pisortanut ilaangikkaluartut, pingaartuuvoq maluginiassallugu, susassaqaarfiit ilaanni suliffeqarfeqarmat, ima pisortatigut

malittarisassiugaatigisunik pisortat ingerlassaattut isigisariaqarlutik, naak inatsisitigut naliliigaanni namminersortutut isigisariaqaraluarlutik.

Imminut pigisutut ilusiliinermut matumani tunuliaqutaavoq politikikkut kisaatigineqarmat ingerlassaqarnerup susassaqaarfimmut inatsisitigut namminersortumut inissinneqarnissaa, taannalu pisortat pigisaannit aningaasanik nalilinnit pisortallu nakkutilliinerannit avissaaqqavoq, ilaallunili susassaqaarfiup inatsitigut namminersortup annertuumik nakkutiginnissaanik kissaateqarnek. Taamaaliornikkut oqartussaasut politikikkooortumik suliffeqaarfimmut inatsisiliornek aqputigalugu suliffeqaarfiit ingerlassaannut sunniuteqarnissamut periarfissaqarput. Aammattaaq inatsisit pisortatigoortut aqputigalugit folkehøjskolit annertuumik malittarisassiugaanerat pissutigalugu, ilimagisaavoq suliat suliarineqartarnerat aamma tamat paasitinneqartarnerat pillugit inatsisinut ilaassasut.

Aammattaaq inatsisit atuuttut naapertorlugit aalajangersakkami aalajangiunneqarpoq siulersuisut tassaasut folkehøjskolit qullersaasumik oqartussaasui. Ilutigisaanik aalajangersakkami ersippoq folkehøjskolit ingerlatsinerinut tamanut qullersaallutik akisussaasut tassaasut siulersuisut. Taamaalilluni tassuunakkutaaq inerniliunneqarsinnaavoq, folkehøjskolit aalajangiinerinut, tamatumunngalu ilanngullugu taakkua kinguneriuunagaannut, akisussaaneq siulersuisuni tamarmiusuniittoq.

Siulersuisut akisussaanerat, siulersuisut Namminersorlutik Oqartussat tapiissutaannik tapiissutinillu allanik ingerlatsinerannut, folkehøjskolillu folkehøjskolit siunertaasa iluanni suliassanik isumaginninnerannut attuumassuteqarpoq. Taamaalillutik siulersuisut aalajangiussaminnut akisussaapput. Tassunga atatillugu eqqaaneqassaaq folkehøjskolit Namminersorlutik Oqartussat saniatigut tapiissutinik allanut qinnuteqarsinnaammata.

Tamatumani sallerpaatillugu pineqarput aningaasaqarnermut tunngatillugu imaluunniit aningaasatigut kinguneqartussamik aalajangiinerit. Tamatumunnga atatillugu aallaavittut pisussaaffiuvoq ilinniarfiit nukissatigut sillimmataannik ingerlatsinissaaq, taakku ilinniarfiup siunertaanut annertunerpaamik iluaqutaasussanngorlugit. Tamatuma kingorna siulersuisut Nunatta Karsianiit aningaasaliiffigineqartumik ingerlassanut naleqqiullugu Naalakkersuisunut akisussaassapput.

Aammattaaq siulersuisut akisussaaffigissavaat qularnaassallugu, folkehøjskolit ima aqqissugaanerat, aningaasat atugassiissutaasut pitsaanerpaamik sunniuteqarsinnaanngorlugit, sulisullu piginnaasaasa pitsaanerpaamik atorneqarlutillu ineriartortitaanissaat. Taamaattoq tigussaasumik suliassanik agguassineq folkehøjskolit forstanderinit isumagineqassaaq, tak. siunnersuummi § 10, kisiannili siulersuisut pingaarnersutigut tunaartarisassiaasa iluanni.

Tamatumunnga atatillugu eqqaaneqassaaq, siulersuisut akisussaaneq siulersuisuni ilaasortanut tamanut atuutissamat. Tamatumunnga ilanngullugu eqqaaneqassaaq, siulersuisut akisussaaneq ataatsimut ima isigineqarsinnaammata, aalajangiinerit nalinginnaasut niuertutullu ingerlatsinerimut tunngasut akisussaataitanermik nassataqartaralik. Allatut oqaatigalugu siulersuisut silatusaartumik suliamillu ilisimasaqarpalaartumik iliuseqartussaapput, tamatumunngalu atatillugu nalinginnaasuunngilaq niuertutut ingerlatsinerimut atatillugu kukkusumik aalajangiisimanernut akisussaataitaasarneq.

Aalajangersakkami siunnersuutaavoq siulersuisut amerlassusissaat aalajangerneqassasoq. Tamatumunnga atatillugu siunertamut naapertuunnerpaatut isigineqarpoq siulersuisut

amerlassusissaat 5 - 7-llu akornanniittussatut aalajangiunneqarpat. Ilimagineqarpoq taamaaliornikkut siulersuisut iliuuseqarsinnaanerulissasut.

Aammattaaq aalajangersakkami naggatit aappaanni ersippoq, siulersuisut aningaasanut missingersuutit akuersissutigissagaat, taamaalillunilu siulersuisut missingersuummi qullersaaffigalugit aningaasat agguaannissaat akisussaaffigaat. Tamatumani pineqarput ataatsimoortumik aningaasartuutit tamarmiusut aamma susassaqarfinnut assigiinngitsut agguaannissaat. Ilutigisaanik aalajangersakkami naggatit pingajuanni ersippoq, siulersuisut naatsorsuutit atsiornissaat pisussaaffigigaat, tamatumalu assigaa siulersuisut naatsorsuutit akuersissutigissagaat.

Imm. 2-mut

Aalajangersakkap imarisamigut Inatsisartut peqqussutaanni atuuttumi § 6, imm. 3, nr. 6 assigaa. Taamaattoq siunnersuummi piffissaq atuuffik killilerneqarpoq, tamannali taamaallaat siulersuisunut ilaasortanut siunnersuutip atuutilernerata kingorna toqqagaasunut atuutissaaq. Folkehøjskolit namminneq ileqqoreqqusaanni malittarisassat naapertorlugit siulersuisut toqqagaasarnerat isiginiarneqassaaq folkehøjskolit suliffeqarfittut imminnut pigisutut inissisimanerannut naleqqiullugu, tamatumalu nassataraa ileqqoreqqusaq tassaammat folkehøjskolit tunngaviusumik pappiaraat. Tassuunakkutaaq folkehøjskolit Namminersorlutik Oqartussanut naleqqiullugu imminnut ingerlatarinerat ersersinneqarpoq.

Imm. 3-mut

Aalajangersagaq nutaajuvoq, tassanilu siulersuisunut ilaasortanit piunasaqaataasut saqqummiunneqarput, siulersuisut suliamik ilisimasaqartunngorsarnissaasa qularnaarnissaa siunertaralugu. Folkehøjskolit akisussaaffeqarfiat tunuliaqutaralugu, tamatumunnga ilanngullugit ingerlassassat nutaat siunnersuummi eqqaaneqartut aamma folkehøjskolit inatsisitigut suliffeqarfittut imminnut pigisutut inissisimanerat tamatumani aningaasaatigut akisussaaffeqarneq eqqarsaatigalugu, kissaatiginartinneqarpoq ilinniarfiit aqutsisuisa nukittorsarnissaat.

Tamanna sallerpaatillugu anguniarneqarpoq siulersuisut annertunerusumik suliamik ilisimasaqartunngorsarnerisigut, naapertuuttunik pisinnaasaqarnissaannik piunasaqaateqarneq aqqutigalugu. Tamatumunnga ilanngullugu siulersuisut sapinngisamik annertunerpaamik folkehøjskolit soqutigisaat isumagisinnaasussaavaat, ilinniartitsinermut tunngasutigut, tamatumunnga ilanngullugit pitsaassutsumut, aningaasaqarnikkut, suliamut, aqutsinermut aaqqissuussaaneermullu piunasaqaatinut tunngasut. Pisinnaasariaqartut aalajangersakkami taaneqartut folkehøjskolit tamarmiusumik ingerlatsinerat ingerlassaallu aallaavigalugit aalajangersarneqarput.

Aammattaaq Inatsisartut Allattoqarfianni Inatsisileriffimmit tamanna pillugu nassuiaat tunngavigalugu aalajangersagaq ilanngunneqarpoq tassa, siulersuisunut ilaasortat toqqarneqarnerat pillugu folkehøjskolit Naalakkersuisunut ilisimatitsisarnissaat. Tamatumani periarfissaqalissaaq folkehøjskolip naggatit siullianni piginnaassutsit pillugit piunasaqaatinik aalajangersakkat maleruarnelai naliliissalluni. Tamanna ima paasineqassaaq piginnaassutsit pillugit piunasaqaatit folkehøjskolit akuersissutigineqarnissaat pillugu apeqqummut tunngassuteqartut, takkuk siunnersuummi § 11, imm. 2 naggatit pingajuat.

Imm. 4-mut

Aalajangersagaq nutaajuvoq ivertinneqarlunilu folkehøjskolit qullersaasumik aqutsisuisa folkehøjskolillu ulluinnarni pisortaata - tassalu forständerip - qanimut suleqatigiinnissaat

qularnaarumallugu. Tassuunakkutaaq anguniarneqarpoq, forstanderip siulersuisut aalajangiineri, pilersaarutaat pingaarnerusutigullu iliuuseriniagaat pillugit ingerlaavartumik paasiniaasarnissaa. Aalajangersagaq aammattaaq imarivaa, siulersuisut folkehøjskolip ulluinnarni aqutsisuinut - tassalu sallerpaatillugu forstanderianut - kaammattuiuarnissaannik piunasaqaat. Tamatumunnga peqatigitillugu malugeqquneqarpoq imatut pisoqartassamat siulersuisut siulersuisut ataatsimiinnerini forstanderip ataatsimeeqataatinngitsoornissaanik aalajangiisinnaammata, soorlu taasisinnaatitaanermi apeqqutit aallaavigalugit.

Siulersuisunut allatsitit suliamut atatillugu naatsorsuutigineqarpoq, forstanderip qularnaassagai oqaluuserisassat piareersarnerat aamma siulersuisut siulittaasuannut pisariaqartutigit uppersarsarsuineq siulersuisunillu ataatsimiisitsineq, taamatullu forstanderip siulersuisut ataatsimiinnerisa imaqarniliornerat isumagissavaa. Tamatumunnga atatillugu forstanderip suliassat tigussaarnerusut sulisunut allanut tunniussinnaavai.

Forstanderip taasisinnaatitaannginneranut pissutaapput soqutigisatigit aporaattoqannginnissaanik nalinginnaasumik isiginneriaaseqarneq, tassami siulersuisut tassaapput forstanderimik atorfinitsitsisartut, tak. siunnersuummi § 9, imm. 2, naggat siulleq.

§ 9-mut

Aalajangersagaq Inatsisartut peqqussutaanni atuuttumi § 4-mik ilaatigut ingerlatitseqqiineruvoq, tassanilu sallerpaatillugu siulersuisut suliassaasa ilaat pineqarput.

Imm. 1-imut

Aalajangersakkami naggammi siullermi ersippoq, siulersuisut folkehøjskolip ingerlassineranut pingaarnerusutigut sinaakkusiissasut. Tamatumani assersuutigalugu pineqarsinnaapput ilusissatut pilersaarusiit piffissamullu ungasinnerusumut pilersaarutit, aammattaaq aalajangersagaq tassaavoq folkehøjskolip siulersuisuisa forstanderillu suliassaasa agguannerannik erseqqissaaneq. Aammattaaq aalajangersakkami piunasaavoq, siulersuisut folkehøjskolip piffissami qaninnermi ungasinnerusumilu ineriartornissaa pillugu isummersimassasut.

Siulersuisut ingerlassassanut pilersaarutiniq aalajangersaanissaannut tunngatillugu, tak. aalajangersakkami naggatit aappaat, ilanngunneqassaaq, ulluinnarni forstanderip tassaassamat piffissami aalajangersimasumi ingerlassassanik pilersaarusiortoq, soorlu ukioq kaajallallugu. Tassunga tunngatillugu ingerlassanut pilersaarut tassaavoq, piffissami pineqartumi ingerlanneqartussat pillugit pilersaarut, ilaatigut suliassat assigiinngitsut qaqugukkut kikkunnillu suliarineqassanersut takussutissiarineqarfiat. Taamaalilluni ingerlassanut pilersaarummut ilaapput folkehøjskolit ingerlassat tamarmik, ilinniartitsinermulli pilersaarutit taamaallaat tassaallutik pilersaarutit ilinniartitsinermut pikkorissarnermulluunniit aalajangersimasumut attuumassuteqartut. Aammattaaq aalajangersakkami naggatit aappaata naggataanit takuneqarsinnaavoq siulersuisut Naalakkersuisunut akisussaaffigigaat, ilinniartuup ingerlassaasa siunertami aalajangersakkanut naapertuuttuunissaat, tak. siunnersuummi § 1, imm. 5, tamatumunnga ilanngullugit nalunaarutit § 1 naapertorlugu pilersitat ilinniartitsinermullu pilersaarutaajunnartut, ilinniartuup ilinniartitsinikkut ingerlassaanut attuumassuteqartut.

Imm. 2-mut

Aalajangersagaq ilaatigut Inatsisartut peqqussutaanni atuuttumi § 4, imm. 2-mik ingerlatitseqqiineruvoq, tassanilu pineqarlutik siulersuisut forständerimut naleqqiullugu pisinnaatitaaffii.

Aalajangersakkami naggat siulleq Inatsisartut peqqussutaanni atuuttumi § 4, imm. 2-mik ingerlatitseqqiineruvoq, aalajangersarneqarlunilu forständerimik atorfinitsitsisarneq soraarsitsisarnerlu folkehøjskolip siulersuisuiniittoq. Aalajangersagaq siulersuisut folkehøjskolimi qullersaallutik akisussaanerinit sanilliunneqassaaq. Aalajangersakkap aammattaaq aallaavigivaa oqartussaasut nalunaartarfiillu erseqqissumik qularnaarnissaat, forständerillu siulersuisunut tatiginassuseqarnissaata qularnaarnissaa. Taamaaliornikkut anguniarneqarpoq forständerip siulersuisullu akornanni pilersitsiffiulluatumik suleqatigiinnissaaq.

Aalajangersakkami naggatit aappaat nutaajuvoq, siunertaralugulu siulersuisut forständerillu akornanni pisinnaatitsisinnaanerup pilersinnissaa, tassami siulersuisut forständeri peqqusinnaavaat siulersuisut sinnerlugit suliassat aalajangersimasut suliareqqullugit. Tamatumani assersuutigalugu pineqarsinnaavoq ilinniartitsinerimut pilersaarutit sularinissaat, tak. siunnersuummi § 9, imm. 4.

Taammaakkaluarpalluunniit siulersuisut suliassap sularinissaanut akisussaajunnaarsinneqassanngillat. Taamaalilluni siulersuisut suliassanut aalajangersimasunut tunngatillugu akisussaanerit tunniussinnaanngilaat. Saniatigut siunnersuutigineqarpoq siulersuisut forständerip suliassanik nalinginnaasumik tunaartarisassalorsinnaanerit erseqqissumik malittarisassiorneqassasoq.

Imm. 3-mut

Aalajangersagaq tamarmi Inatsisartut peqqussutaanni atuuttumi § 4, imm. 3-mik ingerlatitseqqiineruvoq. Suliffeqarfinnut imminnut pigisunut nalinginnaasumik atuuttartut naapertorlugit, aalajangersakkap aallaqqaataani ersippoq siulersuisut namminneq folkehøjskolip ileqqoreqqusassaa sularissagaat, taamaattorli taanna Naalackersuisunit akuerineqassaaq, tamatumani suliassartaa Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmit isumagineqartarpoq, tak. siunnersuummi § 11, imm. 2, nr. 1. Ileqqoreqqusami ilaatigut allassimassapput siulersuisunut ilaasortat toqqarneqarneranni periusissat ersarissut.

Saniatigut aalajangersakkap naggataani ersippoq, siulersuisut aammattaaq suliassarigaat ingerlassinerminni sulariaasissartik, tamatumalu siunertaraa siulersuisuni sulinerup sunnuteqarluarsarnissaa, tamannalu siulersuisut taamaaliornermikkut siulersuisuni sulinerim atugassarititaasussanik namminneq aqqissuussisinnaanerannut sanilliunneqassaaq.

Imm. 4-mut

Aalajangersagaq nutaajuvoq siunertaralugulu qularnaassallugu, Naalackersuisut ilinniartitsinerup siunnersuummi § 1 naapertorlugu ingerlanneqartup, tapiiffigineqarsinnaasullu imarisani nakkutilliillutillu naliliisinaanissaat. Folkehøjskolit namminneerlutik ilinniartitsinerimut pilersaarutinik suliqaarnissaannut tunngaviuvoq eqqarsaatersuutigineqarmat folkehøjskolit ilimagisariaqarmata ilinniartitsinerup imarisassai pillugit suliassamik immikkut ilisimasaqassasut, taamaammallu aamma ilinniartitsinerup immikkoortuisa qanoq naapertuutsiginerisa nalilernissaannut piukkunnarnerpaajusut.

Taamaammat naatsorsuutigineqarpoq folkehøjskolit ilinniartitsinerup immikkoortuisa assigiinngitsut naleqquttuunerannik naliliinissamut piukkunnarnerpaasutut ilimagisariaqarput, taamaammallu aamma ilinniartitsinerup ilinniarfiup neqeroortiginiagaata erseqqinnerusumik allaaserinissaa isumagisariaqarlugu. Aammattaaq siulersuisut ilinniartitsinerup pilersaarusiit tigussaannerusutigut suliaassartaat forständerimut isumagisassanngortissinnaavaat, tak. siunnersuummi § 9, imm. 2, naggatit aappaat.

Ilutigisaanik oqaatigineqassaaq ilinniartitsinerup pilersaarutinik Naalakkersuisunut akuersissutigisassatut nassiussinissamut pisussaaffik, ilinniartitsilluni ingerlatanut ilinniartitsinerup pilersaarutit Naalakkersuisunit akuerineqareersut tunngavigalugit ingerlanneqartunut atuutinngimmat, tak. siunnersuummi § 9, imm. 4, naggatit aappaat. Tassunga atatillugu oqaatigineqassaaq ilaatigut inuutissarsiutinik ilinniartitsinerup iluani arlalinnik ilinniartitsinerup pilersaaruteqareermat, ilinniartitsinikkut ingerlassanut akuerisaareersunut tunngasunik.

Tamatuma kingorna Naalakkersuisut pisussaaffigaat ilinniartitsinerup pilersaarutit akuerinissaasa isummerfiginissaat, tamatumani ilaatigut aallaavigineqassapput ilinniartitsinerup pineqartup qanoq naapertuutsiginera, taamatullu folkehøjskolip ilinniartitsinerup pineqartumik ilinniartitsinerup pilersaarut naapertorlugu pissusiviusut naapertorlugit ilumut ingerlatsisinnaanera aammattaaq apeqqutaataasinnaavoq.

Aalajangersakkap naggataasa pingajuanni siunnersuutigineqarpoq pinnaatitsissummik ikkussisoqassasoq, ilinniartitsinerup pilersaarutit pillugit Naalakkersuisut erseqqinnerusunik malittarisassiuussillutik nalunaarusiorsinnaanngorlugit. Tamatumani pineqarsinnaapput taakku tiguneqareernissaannut piffissaliussat, aammattaaq aalajangersarneqarsinnaavoq ilinniartitsinerup pilersaarutit immikkuualuttut suut imarissaneraat. Taakku tassaasinnaapput ilinniartitsinissatut pilersaarutit erseqqissumik allaaserineqarnissaanik piunarsaatit, ilinniartitsinerup inuiaqatigiinnut kalaallinut naleqqiullugu qanoq naapertuutsiginera, aningaasalersuinissamut tunngasut, ilikkagassatut pilersaarutit il.il.

Naatsorsuutaavoq aalajangersagaq malittarisassanik tamatigoornerusunik aalajangersaanerup atorineqassasoq, ilinniartitsinerup pilersaarutit imarissaat pillugit erseqqissumik tunaartarissassiisunik, taamaammallu nalunaarut taamaattoq ilinniartitsinikkut ingerlassat ataasiakkaat pillugit suliarineqartariaqanngilaq. Takuneqarsinnaasutut nalunaarummi taamaattumi aammattaaq ilinniartitsinerup pilersaarutit akuerisaareersut tunuarnissaannut malittarisassanik imaqarsinnaavoq, tamannalu pisariaqalersinnaavoq inuiaqatigiinni ineriartorerup kingunerisaanik ilinniartitsineq pisariaaruttutut nalilerneqarpat, tamatumunnga ilanngullugu ilinniartitsineq pisoqalisutut isigineqarpat, aningaasaqarnerup tunngasut pissutigalugit imaluunniit ilinniartitsinerup pilersaarut ilinniartitsinerup ingerlanneranut naleqqiullugu atorineqarsinnaajunnaartutut nalilerneqarpat.

Imm. 5-imut

Aalajangersagaq nutaajuvoq. Aalajangersakkap siunertaraa siulersuisut pisariaqartitsineq naapertorlugu ataatsimiititaliorsinnaanerup periarfissaqarnerisa ersarissarnissaat, tamatumani soppaat pineqarnerup apeqqutaatillugit inuit immikkut ilisimasallit katersorneqarsinnaallutik. Tamatumani pineqarsinnaapput ataatsimiititaliat ataavartut imaluunniit ataatsimiititaliaagallartut. Aalajangersakkami pineqarput ataatsimiititaliat siulersuisut namminneq pilersitaat. Kisianni taamatut ataatsimiititaliornerup siulersuisut akisussaaffiit tunngasut nikisinnilai.

§ 10-mut

Aalajangersagaq pingaarnertigut Inatsisartut peqqussutaanni maanna atuuttumi § 5-imik ingerlatitseqqiineruvoq, taamaattorli aalajangersagassatut siunnersuutaasoq forständerip ulluinnarni suliaasaanik arlaqartunik ilaneqarluni.

Imm. 1-imut

Aalajangersakkap forständerip akisussaaffii pisinnaatitaaffiilu siulersuisunut naleqqiullugit killilersorpai, taamatullu aalajangersakkap forständerip siulersuisut anguniagaannik aalajangiannillu piviusunngortitsiniarnissamut pisussaaffeqarneranut atatillugu ilumuussuseqartuunissamut pisussaaffeqarnermik imaqarluni, tak. aalajangersakkami nr. 4. Ilutigisaanik aalajangersakkap erseqqissarpaa, perorsaanikkut ilinniartitsinikkullu akisussaaneq forständerimiittoq, taassumalu ilutigisaanik ulluinnarni aqutsinerup siulersuisut pingaarnerusutigut tunaartarisassiaasa iluanni pinissaa qularnaartussaavaa.

Perorsaanikkut akisussaannermut annermik pineqarpoq, folkehøjskolip pingaartitamigut tunngavii aallaavigalugit sinaakutissat toqqissisimanartut, unamminartullit ineriartuutaasullu qularnaarneqarnissaat, aamma inooqatigiissutsikkut sammisassanik neqeroorutinillu aallarnisaanissaq, ilinniartut ilinniartitsisut peqatigalugit aallusinnaasaannik. Perorsaanermut tunngasut aamma suliaasat pilersitsiffiusut tigusaasullu ataatsimoorluni suliarinerinut, kulturimut tunngasunik sammisaqarnermut allatigullu ataatsimoorluni misigisaqarnermut, ilinniartut ataasiakkaat ineriartornerinik, peqataanerinik paasinninnerinillu tapersersuisunut attuumassuteqarsinnaapput. Ilinniartitsinikkulli akisussaaneq sallerpaatillugu ilinniartitsinerup ilinniartitsinerup pilersaarutit naapertorlugit pinissaanut tunngassuteqarpoq, tamatumunnga ilanngullugu ilinniartitsinerup siunertaanut naleqqiullugu ilinniartut piukkunnarsarnissaat.

Tamatuma saniatigut forständerip nakkutigissavaa, folkehøjskolip inatsisit malittarisassallu allat naapertorlugit ingerlanera, imaappoq forständerip qularnaassavaa ilinniartitsinerup ilinniartitsinerup pilersaarutit naapertorlugit ingerlanera, tak. aalajangersakkami nr. 1. Aalajangersakkami nr. 2-mi aalajangiunneqarpoq, forständerip qularnaassagaa ilinniartitsinerup pissutsit illersorneqarsinnaasuunerat, tamannalu pissutsinut tigusaasunut soorlu ilinniartitsinerup avatangiiserisanut tassalu ininut aamma ilinniartitsinerup atorussanut pisariaqartunut naleqqiullugu kiisalu ilinniartitsisoqarnerup pissutsinut tunngatillugu atuuppoq. Aalajangersakkami nr. 3-mi piumasarineqarpoq aningaasat ulluinnarni aqutsisuusunit naammaginarumik aqutarinissaat.

Imm. 2-mut

Aalajangersagaq nutaajuvoq. Siunnersuutigineqarpoq forständerip siulersuisunut naleqqiullugu suliaasami ilaattut siunnersuusiortassagaa ilinniartitsinerit qanoq ittut, ilinniakkat pikkorissarnerillu suut il.il. folkehøjskolip ukiumi aggersumi neqeroorutigissanera. Tamatuma kingorna siulersuisut pilersaarut akuersissutigissavaat, taamaalillutillu folkehøjskolip ukiumi aggersumi pilersaarutaanik inaarutaasumik aalajangiisuullutik. Ukiumi aggersumi folkehøjskolip ingerlatsineranut pilersaarummi (ukiumoortumik pilersaarummi) pineqarput ukiumi aggersumi folkehøjskolip ingerlanniagaani anguniagassat pingaarnarpaat. Ukiumoortumik pilersaarutit tassunga atatillugu tassaapput folkehøjskolip ingerlatsineranut aamma ingerlatsinermini ataqatigiissitsineranut takussutissat. Ilutigisaanik pilersaarutit aamma tassaasinnaapput ilinniartitsinerup kikkut tamarmik piffissaagallartillugu paasissutissarsitinnissaannut sakkussat, pineqartut qitiusumik ingerlassat pisussallu pillugit piareersimanissaannut atorsinnaasut. Ukiumoortumik pilersaarut aammattaaq ilinniartitup oqaluttuassartaanik pilersitsinerup

pingaaruteqarpat, sulisunit tamanit isummerfigineqarsinnaallutik suliareqqinneqarlutillu, taamatullu iliuuseriniakkat anguniakkallu ersersinneqarsinnaallutik. Ilangullugu eqqaaneqassaaq assersuutigalugu ingerlassanut pilersaarutit, tak. Qulaani § 9, imm. 1 pillugu oqaaseqaatit, ukiumoortumik pilersaarummut ilaasinnaammata.

Imm. 3-mut

Aalajangersagaq Inatsisartut peqqussutaanni maanna atuuttumi § 5, imm. 2-mik ingerlatitseqqiineruvoq, oqartussaassuseqarnerup ersarissumik iluseqarnissaa tunngavigineqarluni, taamatuttaaq aalajangersakkap qularnaassavaa forstanderip folkehøjskolimi atorfeqartunik tamanik aqutsinissaminut ilitsersuinissaminullu pisinnaatitaaffeqarnissaa. Aalajangersagaq aammattaaq forstanderip siulersuisut aalajangiussaannik piviusunngortitsisussaataitaneranut sanilliunneqassaaq, taamaammallu siunertamut naapertuunnerpaavoq forstanderip aammattaaq sulisut qanoq katitigaanissaat aalajangerpagu, suliassat suliarinissaannut nukissarisat pitsaanerpaat qularnaarnissaat siunertaralugu.

Imm. 4-mut

Aalajangersagaq nutaajuvoq nassataralugulu forstanderip missingersuutitut naatsorsuutinullu tunngasut killiffiannik siulersuisut ukiup naatsorsuiffiusup ingerlanerani ilisimatittassammagit, tunaartarisassat siulersuisunit aalajangersarneqartut naapertorlugit. Tamatuma saniatigut aalajangersakkap nassataraa, forstanderip naatsorsuutinik atsioqataasassammatt, taakku siulersuisunut akuerisassatut nassiunneqannginnerini, tak. § 8, imm. 1, naggatit pingajuat.

Forstanderip atsioqataanera, forstanderip nalinginnaasumik ulluinnarni naatsorsuutinik suliaqarneranut sanilliunneqassaaq. Taamaalilluni forstanderip - suliffeqarfiup ingerlatsineranik ulluinnarni nakkutilliisuusup - atsiornermigut siulersuisunut uppersarsassavaa, naatsorsuutitut tunuliaqutaanini. Taamaattoq forstanderip atsioqataanera siulersuisut akisussaaffiannut sunniuteqanngilaq, taamaammallu taamaaliornikkut siulersuisut akisussaaffiat forstanderimut nuunneqassanani.

§ 11-mut

Aalajangersagaq pingaarnertigut Inatsisartut peqqussutaanni maanna atuuttumi § 6-ip assigaa. Aalajangersakkap folkehøjskolit akuerisaanissaannut atatillugu apeqqut aamma tapiiffigineqarnissamut piumasaqaatit malittarisassiorpai.

Imm. 1-imut

Aalajangersagaq Inatsisartut peqqussutaanni atuuttumi § 6, imm. 1-imik ingerlatitseqqiineruvoq.

Takuneqarsinnaasutut folkehøjskolip akuerisaanissani inatsisitigut piumasarisinnaanngilaa, tassami akuersinissamut ilaatigut piumasaqaatit ataani allaqqasut apeqqutaapput.

Aalajangersakkami aalajangersarneqarpoq folkehøjskolit tapiiffigineqarnissaannut tunngaviumik piumasaqaatit piviusunngortittariaqartut. Siulleq tassaavoq Naalackersuisunit akuerineqarnissaaq aappaallu tassaalluni siunnersummi §§ 13-16-imi erseqqinnerusumik piumasaqaataasut piviusunngortissimanissaat. Taamaalilluni tapiiffigineqarnissamut piumasaavoq piumasaqaatit tamarmik piviusunngortinneqarsimanissaat.

Ilutigisaanik oqaatigineqassaq folkehøjskolit pioreersut marluk, tassalu Knud Rasmussen Højskolia aamma Sulisartut Højskoliat akuerisaammata Folkehøjskolit pillugit inatsisartut peqqussutaa nr. 1, 16. oktober 1980-imeersoq maanna atorunnaarnikoq tunngavigalugu, akuersissutillu ingerlatiinnarneqarmata Inatsisartut peqqussutaanni maanna atuuttumi 2002-meersumi § 15, imm. 2 naapertorlugu. Siunnersuummut matumunnga naleqqiullugu siunnersuummi § 23, imm. 2-mi siunnersuutigineqarpoq, ilinniarfiit pineqartut akuerisaanerat ingerlaannassasoq, taamaattorli ilinniarfiit taakku 1. marts 2011 nallertinnagu ileqqoreqqusat Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfimmut akuerisassatut nassiutereersimassagaat.

Imm. 2-mut

Aalajangersagaq Inatsisartut peqqussutaanni maanna atuuttumi § 6, imm. 2-mik ingerlatitseqqiineruvoq, Naalackersuisullu folkehøjskolinik akuersinissaminnut toqqammavissaat aalajangersarlugit. Akuersinissamut piumasaavoq piumasaqaatit aalajangersakkami taaneqartut tamarmik piviusunngortinneqarsimanissaat. Aalajangersakkami nr. 1-imi ersittutut piumasaqaat siulleq tassaavoq, Naalackersuisut folkehøjskolip ileqqoreqqusaliaa akuerisinnaassagaat, taamatullu folkehøjskolip uppersarsinnaassavaa, init atortullu naapertuuttut pigalugit. Aammattaaq Inatsisartut Allattoqarfianni Inatsisileriffimmiit tamatumunnga nassuiaat tunngavigalugu piumasaqaat ilanngunneqarpoq, tassa folkehøjskolit siulersuisuisa aammattaaq siunnersuummi § 8, imm. 3-mi piginnaassuseqarnissamut piumasaqaatit taaneqartut eqqortissammatigik.

Naalackersuisut, ulluinnarni Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup siullermik misissussavaa pissutsit imm. 3-mi taaneqartut ileqqoreqqusami taaneqarsimanersut. Minnerpaaffissamik piumasaqaatit imm. 3-mi taaneqartut piviusunngortinneqarsimanngippata ileqqoreqqusaq akuerineqarsinnaanngilaq.

Imm. 3-mut

Aalajangersagaq Inatsisartut peqqussutaanni maanna atuuttumi § 6, imm. 3-mik ingerlatitseqqiineruvoq, imm. 1-imullu oqaaseqaatini eqqaaneqartutut aalajangersarlugit, pissutsit suut folkehøjskolit ileqqoreqqusamikkut malittarisassiussaneraat, Naalackersuisunik akuerineqarnissaq siunertaralugu. Taamaalilluni aalajangersagaq akornutaanngilaq, folkehøjskolit pissutsinik naapertuuttunik ileqqoreqqussamut ilanngussinissaannut naleqqiullugu. Tamatumani assersuutigalugu pineqarsinnaapput pissutsit siulersuisut suleriaasissaannut tunngasut ilanngunnissaat, taamatuttaaq folkehøjskolip pingaartitatigut tunngavii ileqqoreqqussamut ilanngunneqarsinnaapput.

Aammattaaq malugeqquneqarpoq ileqqoreqqusamiissammata siulersuisunik toqqaasarnermut malittarisassat, tamatumunnga ilanngullugit kikkut toqqaasinnaatitaanersut, piffissaq siulersuisut atuuffiat, taamaattoq tak. siunnersuummi § 8, imm. 2, kiisalu siulersuisut annertussusissaannik aalajangersakkat, tak. § 8, imm. 1.

§ 12-imut

Aalajangersagaq pingaarnerusutigut Inatsisartut peqqussutaanni maanna atuuttumi § 7-imik ingerlatitseqqiineruvoq, folkehøjskolinillu akuersissutaasup tunuartinneqarsinnaanera malittarisassiuullugu.

Imm. 1-imut

Imm. 1-imi naggammi siullermi ersippoq folkehøjskolimik akuersissutaasimasoq tunuartinneqarsinnaasoq, folkehøjskolip ileqqoreqqusaa akuerineqarsinnaajunnaarpat. Assersuutigalugu folkehøjskolit pioreersut marluusut ileqqoreqqusaat kingusinnerpaamik 1. marts 2011 nassiunneqartut akuerineqarsinnaanngippata, tak. siunnersuummi § 23, imm. 2, naggatit aappaat, tamatuma assigissavaa folkehøjskolit akuerineqarsinnaanngitsut.

Taamatuttaaqtuuppoq, paasinarsippat folkehøjskolit naammaginartunik ilinniartitsinermi atugassaqtitsiunnaartut, tak. siunnersuummi § 11, imm. 2, nr. 2. Aammattaaq aalajangersakkami naggatit aappaanni ersippoq, akuersissut tunuartinneqarsinnaasoq, paasinarsippat folkehøjskolip siunnersuummi § 1-imi piumasaasut folkehøjskolit ingerlassaanut tunngasut piviusunngortissinnaajunnaarai.

Tamatumani pineqarsinnaavoq ilinniartitsinerup assersuutigalugu ilinniakkami pineqartumi nalinginnaasumik piumasaqaataasut piviusunngortinngikkai, imaluunniit paasinarsippat ilinniartitsineq ilinniartitseriaatsit siunnersuummi § 1 aqutigalugu tunngavissinneqartut avataanniittut. Saniatigut aamma pineqarsinnaavoq, siunnersuummi § 1, imm. 4, naggatit pingajuanni suleqatigiinnissamik isumaqatigiissutip atorunnaarsimanera, taamatullu pineqarsinnaalluni siunnersuummi § 1, imm. 5 naapertorlugu malittarisassiat unioqutinneqarnerat.

Imm. 2-mut

Aalajangersakkami ersersinneqarput Naalakkersuisut imm. 1-imi tunuartitsinissamut periarfissamik atuinissaannut annertusiartortitsinissamik piumasaqaateqartoq. Aalajangersakkap nassataraa akuersissutip tunuartinneqannginnerani peqqusinerit sakkukinnerusumik kinguneqartussat atorneqaaqqaartariaqarmata, pissutsit akuersissutip tunuartinneqarnissaanik pisariaqalersitsisut aaqqiiviginiarneranni.

§ 13-imut

Aalajangersagaq Inatsisartut peqqussutaanni maanna atuuttumi § 8-mik ingerlatitseqqiineruvoq, tassanilu folkehøjskolit akuerisaasut tapiiffigineqassagunik piumasaqaatit amerlanerit piviusunngorteqqaartariaqagaat nalunaarsorneqarlutik.

Aalajangersakkami nr. 1-imut pissutaavoq pingaarnerusutigut kissaatigineqarmat akissarsianut tunngatillugu aningaasartuutit aqunneqarsinnaanissaat, taamatullu aalajangersakkami ersersinniarneqarpoq kissaatigineqarmat, tapiissutit sallerpaatillugu atorneqassasut siunnersuummi § 1 naapertorlugu ingerlassanut.

Aalajangersakkami nr. 2-mi ersersinneqarpoq, folkehøjskolit inatsisitigut namminersortuugamik, atorfinitsitsisarnermut il.il. atatillugu Namminersorlutik Oqartussani atorfilinnut atugassarititaasartut avataanni inissisimasut. Taamaammat soraarnerussutisiaqarnissaq pillugu aalajangersagaliortoqarpoq, forständerip ilinniartitsisullu Namminersorlutik Oqartussani atugassarititaasut assiginik atugassaqtitaanissaat qularnaarumallugu.

Aalajangersakkami nr. 3-mut pissutaavoq, ukiumoortumik nalunaarusiaq nakkutilliinermik oqartussaasunut tassaapput sakkoq siunertamut naapertuuttoq, folkehøjskolip malinnaavigalugulu nalilernissaanut atatillugu.

Aalajangersakkami nr. 4 Naalakkersuisut folkehøjskolit ingerlassassanut pilersaarusiaannik akuersissuteqartarnissaannut tunngasoq ivertinneqarpoq kissaatigineqarmat, pisortatigut suliassaqarfiup folkehøjskolip ingerlassaanik tapiissutit siunertaannut sannilliussisinnaanissaa.

§ 14-imut

Aalajangersagaq pingaarnerusutigut tassaavoq Inatsisartut peqqussutaanni maanna atuuttumi § 9-mik ingerlatitseqqiineq, folkehøjskolillu nalinginnaasumik peroriartuutaasumik ilinniartitsineranut attuumassuteqarluni. Taamaalilluni aalajangersakkami tassani tapiisarnermut malittarisassat pisinnaatitsilerfiusumik ilinniartitsineranut attuumangillat, tak. siunnersuummi § 1, imm. 2-4. Tassuunakkut anguniarneqarpoq maannamut periusaasimasup ingerlateqqinnissaa, imaappoq tapiissutit aalajangersimasuullutik, inatsimmilu minnerpaaffittut piumasaqaatit piviusunngortinneqaraangata tunniunneqartarlutik.

Minnerpaaffiup annikinnerusumik annertunerusumilluunniit qaangerneqarnera taamaalilluni tapiissutinut sunniuteqassanngilaq. Kisiannili arlaannik pissuteqartumik minnerpaaffissaq ataanneqarpat, tapiissutit annikillinissaat periarfissaqassaaq, kisiannili imaangitsoq minnerpaaffissaq ataanneqarniariartoq ingerlaannaq taamaaliortoqassasoq. Tamatumunnga pissutaavoq ingerlatsinerit annikillinerannut isumakkeerfigineqarsinnaasunik pisoqarsinnaammat. Tassunga atatillugu aalajangersakkap imaraa tapiissutinik naatsorsuinissaq pillugu malittarisassaliornissamut pisinnaatitsissut. Pisinnaatitsineq ilaatigut atorneqarsinnaavoq ukiumut ilinniartut ikinneruneranni sapaatip-akunnerisalu ilinniartitsiffiusut ingerlanneqartut minnerpaaffissatut piumasarisaasunit ikinneruneranni tapiissutit annikillineqarsinnaanerat pillugu malittarisassanik aalajangersaanermut. Kisianni pisinnaatitsineq atorneqarsinnaanngilaq ukiumut ilinniartut amerlaneruneranni aamma sapaatip-akunnerisa ilinniartitsiffiusut amerlaneruneranni tapiissutit annertusinissaat pillugu aalajangersagaliornermut. Tamatumunnga atatillugu tapiissutinut ingerlatat annertussusaat apeqqutaanngilaq.

Imm. 1-imut

Aalajangersakkami nalunaarsorneqarput folkehøjskolit nalinginnaasumik peroriartuutaasumik ilinniartitsinerannut tapiisarnissamut piumasaqaatit. Oqaatigineqartutut malittarisassat inatsisit atuuttut aamma folkehøjskolinut tapiisarnermut malittarisassat atuuttut assigaat.

Piumasaqaatigineqarpoq folkehøjskolip tapiiffigineqarsinnaasumik ilinniartitsineq minnerpaamik sapaatip-akunnerinik 36-nik sivisussuseqartoq, annerpaamillu folkehøjskolernernut marlunnut siammaassimasoq ingerlatissagaa. Saniatigut piumasaavoq folkehøjskolimiinneq minnerpaamik sapaatip-akunnerinik 13-inik sivisussuseqassasoq, tamatumunngalu pissutaavoq kissaatigineqarmat ilinniagaqarnerisiaqartitsineranut malittarisassanut ataqatigiissitsinissaq, tassami taamaallaat ilinniakkanut minnerpaamik qaammatinik pingasunik sivisussusilinnut ilinniagaqarsiaqartitsisoqarsinnaavoq, tak. Ilinniagaqarnerisiutit pillugit Namminersornerullutik Oqartussat nalunaarutaanni. Aammattaq piumasaqaataavoq, folkehøjskolit ataasiakkaat minnerpaamik 20-nik ukioq naallugu ilinniartoqassasut. Aalajangersakkap ilusilernerneqarnera malillugu piumasaqaatit sisamaasut tamarnik piviusunngortinneqassapput.

Imm. 2-mut

Aalajangersakkami oqaaseq ukioq naallugu ilinniartoq nassuiarneqarpoq, tassalu sapaatip-akunnerini 36-ni ilinniartoq ataaseq.

Imm. 3-mut

Aalajangersakkap erseqqissarpaa, tapiissutitut ukioq naallugu ilinniartut amerlassusaat aamma sapaatip-akunnerisa tapiiffigineqarsinnaasut ingerlanneqarsimasut amerlassusaat aallaavigalugit naatsorsorneqartassasut. Tassunga tunngatillugu imm. 4-mi ersippoq Naalackersuisut nalunaarutitut ilusiliillutik tapiissutit naatsorsornissaat pillugu aalajangersagaliorsinnaasut. Siunertarineqarpoq folkehøjskolinut tapiissutit naatsorsornissaannut malittarisassat aningaasanut inatsimmi aningaasat immikkoortitat naapertussagaat, ilinniarfiit imm. 1-imi piumasaqaatit piviusunngortissimappatigit.

Imm. 4-mut

Aalajangersagaq tassaavoq Naalackersuisunik tapiissutit tunniunneqartarnerat aqutarinerallu pillugit nalunaarusiorsinnaanerannik pisinnaatitsissut. Inatsisartut peqqussutaanni maanna atuuttumi § 9, imm. 4-mi pisinnaatitsineq atorneqarnikuunngilaq. Kisianni naatsorsuutaavoq pisinnaatitsineq pisariaqalerfiatigit atorneqassasoq, Naalackersuisut suliffeqarfinnik imminnut pigisunik, Nunatta Karsianit tapiiffigineqartartunik, pisariaqartumik nakkutilliisinnaanerannut naleqqiullugu sinaakkusiinissamut periusissanillu aalajangersaanissamut.

Naatsorsuutigineqarpoq nalunaarsuineranut tunngatillugu malittarisassat tassaassasut folkehøjskolit ilinniartut amerlassusaannik nalunaarutaasa aamma Ilinniagaqarnerisqaqartitsiviullu ilinniartut tapiinik nalunaarsuinerisa akuleriisinnerat. Tassunga atatillugu ullumikkut atuuttut naapertorlugit siunnersuutigineqarpoq, ilinniartut angalanerat ilinniagaqarnerisqaqarnermut konto aqutugalugu akilerneqartassasut, tak. siunnersuummi § 20, taamatuttaaq Ilinniagaqarnerisqaqartitsiviup ilinniartut amerlassusaat folkehøjskolernerisa sivisussusaat nalunaarsortuassavai.

§ 15-imut

Aalajangersagaq nutaajuvoq siunnersuummilu § 1, imm. 2-mi pisinnaatitsilerfiusumik ilinniartitseriaatsinut tapiissutit pineqarlutik, tassalu mernguernartulerineranut ilinniartitsissutinullu pilersitsiffiusunut tunngasut, ilinniartut nalinginnaasumik, ilinniakkatigit inuttullu piginnaasaannik annertusaanissamut attuumassuteqartut. Assersuutigalugu pisinnaatitsilerfiusumik ilinniartitsineranut § 1, imm. 3-mi pineqartumut naleqqiullugu, matumani pineqarput ilinniartitsinerit, ilinniarfinit allanit il.il. neqeroorutaariinngitsut.

Imm. 1-imut

Aalajangersakkami aalajangerneqarpoq aammattaaq ilinniartunik pisinnaatitsilerfiusumik ilinniartitsineranut folkehøjskolinut tapiisoqartartoq folkehøjskolimiinneq tunngavigalugu, taamatullu piumasarineqarluni Naalackersuisut ilinniartitsineranut tapiissutinut tunngaviusunut pilersaarutit tigusimassagaat. Sapaatip-akunnerini 36-ni ilinniartitsinissamik piumasaqaammut tunngatillugu eqqaaneqassaaq, tamanna pisinnaammat ilinniartitsinerup holdini arlariinni ataatsikkut ingerlanneqarneratut. Ilinniartitsinerup folkehøjskolernertut aqqissuunnera ima paasineqassaaq ilinniartut folkehøjskolimi najugaqassasut. Matumani pineqarmat ingerlatsineq, assersuutigalugu ilinniarfinit allanit neqeroorutaariinngitsuq, ingerlassat pineqartut akiat aalajangersarneqanngilaq. Taamaammat tapiissutit, tak. aalajangersakkami naggatit aappaat, ilinniakkap suussusianut, imarisaanut, annertussusianut, ilinniartut amerlassusaannut pissutsinullu naapertuuttunut allanut sunniussinnaasut, akiata

aalajangersarnissaannullu naleqqiullugu atorneqarumaartunut atatillugu pissutsit tigussaasut aallaavigalugit aalajangerneqassapput.

Imm. 2-mut

Aalajangersakkami malittarisassiorneqarpoq ilinniartitsinermit pilersaarut sunik imaqaassanersoq, taamatuttaaq ilinniartitsinermit pilersaarutitut piumasagaatit Namminersornerullutik Oqartussat inuutissarsiutinik ilinniartitsinerup iluani ilinniartitsinermit pilersaarutit pillugit nalunaarutaanni piumasagaataasut malippaat. Taamaalilluni ilinniartitsinermit pilersaarummi minnerpaamik allassimassapput ilinniakkap siunertaa, tamatumunngalu ilanngullugu pisinnaasat suut ilinniartut angussagai ilimagisassanersoq.

Ilinniartitsinermit pilersaarutip aammattaaq allaaserissavai, ilinniagaq qanoq sannaqarnersoq, imarisaasunut naleqqiullugu, aamma annertussusaanut tassalu sapaatip-akunneranut tiimiinut sapaatillu-akunnerini qassini ingerlanneqarnissaanut naleqqiullugu il.il..

§ 16-imut

Aalajangersagaq nutaajuvoq erseqqissarlugulu tapiissutit § 1, imm. 3-mi taaneqartut tunniunneqartassasut ilinniarfiit pisinnaatitsilerfiusumik ilinniartitsinerat tunngavigalugu ukiumoortumik tunngaviusumik tapiissutitut, tunngaviusumillu tapiissutit tapeqartinneqassasut ingerlassat apeqqutaatillugit tapiissutinik. Aalajangersarneqarpoq tapiissutit, ilinniarfimmi il.il. nalinginnaasumik ilinniartitsinermit pineqartumik neqerooruteqartartumi, ilinnikkap ingerlanneqaruni akigiumaagaa assigissagaat.

Imm. 1-imut

Aalajangersakkap naggataani siullermi ersippoq, ilinniartitsineq folkehøjskolernertut ingerlanneqassasooq, aamma ilinniartitsineq ilinniartitsinermit pilersaarutit ilinniakkamut atuuttut naapertorlugit ingerlanneqassaaq. Tassunga atatillugu oqaatigineqassaaq, aalajangersakkami ataatsimut isigalugu pineqartut tassaammata ilinniartitsinikkut ingerlassat pioreersut, taamaammallu ilinniartitsinermit pilersaarutit ilinniakkanut pineqartunut atuuttut pigineqariissallutik.

Aalajangersakkami pingaanerusutigut pineqarmat ilinniartitsineq, ilinniarfinit il.il. allanit neqeroorutaareersoq, ingerlatsinerit nuunnerisa suliassat isumaginerat akisunerulersissanngilaat. Tamanna tunuliaqutaralugu aalajangersakkami naggatit aappaanni ersippoq, tapiissutit assigissagaat ilinniarfimmi il.il. nalinginnaasumik ilinniartitsinermit pineqartumik neqerooruteqartartumi, ilinniakkap ingerlanneqaruni akigiumaagaa. Tamatuma nassataraa tapiissutit ilaanneeriarluni taxameteri malillugu tapiissutitut isikkoqarsinnaanerit, ingerlassat apeqqutaatillugit tapiisarnissaq ilinniakkamut pineqartumut aalajangiunneqarsimappat. Pisuni allani tapiissutit naatsorsorneqartassapput, ilinniakkap pineqartup akiata naatsorsornerani tunngaviusartut aallaavigalugit.

Ilinniarfiup folkehøjskoli qinnuigissappagu, holdimik ilinniarfiup tapisiaqaatigisimasaanik ilinniartitsineq ingerlateqqullugu, tamatuma ulluinnarni nassatarissavaa, ilinniarfiup folkehøjskolimut ilinniartitsineranut akiliinera. Kisiannili holdi ataaseq amerlanerilluunniit ilassutaasut pineqarpata, tamatuma assigissavaa ingerlassanik annertusaaneq, taamaammallu folkehøjskoli tapiiffigineqassaaq holdip imaluunniit holdit ilinniartinnerisa akiata assinganik.

Imm. 2-mut

Aalajangersagaq tassaavoq Naalakkersuisunik nalunaarusiornissamut pisinnaatitsissut, taannalu tunngavigalugu Naalakkersuisut tapiissutit naatsorsorneqartarnerat, tunniunneqartarnerat aqutarinerallu pillugit nalunaarusiorsinnaapput, aammattaaq ukioq naallugu ilinniartut ikinnerutillugit sapaatillu-akunneri ilinniartitsiffiusut ikinnerutillugit tapiissutinik ikilisaanissaq malittarisassiorneqarsinnaavoq.

Taamaattoq pisinnaatitsissut atorneqassaaq, Inatsisartut aningaasanut inatsimmi oqaaseqaataat ataqqillugit, tassami oqaaseqaatit inatsisitut atuupput, taamaalillutillu allaffissornikkut peqqussusianit pingaarnerullutik.

§ 17-imut

Aalajangersagaq pingaarnerusutigut Inatsisartut peqqussutaanni maanna atuuttumi § 11-mik ingerlatitseqqiineruvoq, tassanilu pineqarpoq folkehøjskolit ilinniartitsisuisa forständeriisalu ilinniarteqqinneqarnerannut tapiisinnaaneq. Aalajangersakkap nassataraa, ilinniaqqinnernut ingerlaqqiffiusumillu ilinniarnernut il.il. peqataasoqarnera naapertorlugu tapiissutit tunniunneqartassammata, taakku inuit folkehøjskolini sulisut suliaannut toqqaannartumik attuumassuteqarpata.

Imm. 1-imut

Aalajangersagaq Inatsisartut peqqussutaanni maanna atuuttumi § 11, imm. 1-imik ingerlatitseqqiineruvoq, nassataralugulu inuit pineqartut meeqqat atuarfianni pisortat ilinniartitsisullu assingannik atugassaqaartitaallutik tapiiffigineqarsinnaanerat.

Imm. 2-mut

Aalajangersakkami Inatsisartut peqqussutaanni maanna atuuttumi § 11, imm. 2-mik uteqqiineruvoq. Aalajangersakkap erseqqissarpaa, ilinniartitsisut forständerillu piffissap ilaa tamaalluunniit ilinniaqqinnerminnut atatillugu sulinngiffeqartut akissarsiaannut tapiisoqarsinnaasoq. Tamanna tunuliaqutaralugu folkehøjskolini perorsaanikkut suliaqartut ukioq naallugu pikkorissarnissamik qinnuteqarsinnaapput, meeqqat atuarfianni ilinniartitsisunut atugassarititaasut assigalugit imaluunniit assersuutigalugu Ilinniarfissuup Inerisaaviullu pikkorissarnernik neqeroorutaanut peqataasinnaallutik, taakkua maanna tamarnik Iisimatuserfiup ataniipput.

Imm. 3-mut

Aalajangersakkami piunasaavoq, folkehøjskoli forständerip ilinniartitsisullu attuumassuteqarfisaaq ilinniaqqinnermik ingerlaqqiffiusumilluunniit ilinniagaqarnermut aningaasartuutit akileeqqaassasoq. Tamanna tunuliaqutaralugu erseqqissarneqarpoq tapiissutit folkehøjskolimut aningaasartuuteqarsimasumut tunniunneqartassasut. Tassunga tunngatillugu erseqqissarneqassaaq pineqartut tassaammata tapiissutit, taamaammallu piunasaanngimmat ilinniaqqinnermut ingerlaqqiffiusumilluunniit ilinniagaqarnermut aningaasartuutit tamarniusut matussuserlugit tapiisoqarnissaa.

Imm. 4-mut

Aalajangersagaq nutaajuvoq. Siunnersuutigineqarpoq Naalakkersuisut pisinnaatinneqassasut, imm. 1 aamma 2 naapertorlugu ilinniaqqinnernut il.il. tapiissutinut amerlanernik piunasaqaasiornissamut. Taakku saniatigut aalajangersaasoqarsinnaavoq qinnuteqarnermi

periusissat, ilinniagaqaqqissimanerup aamma ingerlaqqiffiusumik ilinniarsimanerup uppersaaserneqarnissai il.il. pillugit.

§ 18-imut

Aalajangersagaq pingaarnerusutigut Inatsisartut peqqussutaanni maanna atuuttumi § 10-mik ingerlatitseqqiineruvoq, tassanilu folkehøjskolit inatsisitigut suliffeqarfittut imminnut pigisutut nammineertuunerat, taamaalillutillu Namminersorlutik Oqartussat avataaniinnerat, ersersinneqarluni.

Imm. 1-imut

Aalajangersakkap folkehøjskolit namminneq aningaasaatiminnut naleqqiullugu imminnut aqutarinerat ersersippaa, taamaalillutillu folkehøjskolit namminneq suliniutitik pingaarnersiorsinnaavaat, namminnerisaminnik ilisarnaateqarsinnaallutik folkehøjskolillu pingaartitatigut tunngavii aallaavigalugit ilinniarsiup neqeroorutigisartagai pisinnaasaqarfiilu inerisarsinnaallugit. Taamaattoq aalajangersakkami naggatit aappaanni imminnut aqutarineq killilerneqarpoq, tassami folkehøjskolit siulersuisuisa aalajangersaanissamut pisinnaatitaaffiat folkehøjskolit siunertaasa, inatsisit atuuttut malittarisassassallu allat sinaakkusiussaasa iluanni pisassaaq.

Ilutigisaanik anermik aningaasaliinermi piumasaqaatit, tapiissutitut attuumassuteqartut, ilinniartitsinermut ilinniartullu amerlassusissaannut atatillugu, siulersuisut namminneerlutik aalajangiisinnaatitaanerannik killiliissapput. Taamaammat aalajangersagaq assersuutigalugu siunnersuummi § 14-imi aalajangersakkanut atatillugu isiginiarneqassaaq, tassani aalajangerneqarpoq, tapiissutitut apeqqutaasut ukioq naallugu ilinniartut amerlassusaat aamma sapaatip-akunnerisa ilinniartitsiffiusut amerlassusaat, taamatullu § 16-imi tapiinissamik naatsorsuineq siulersuisut aalajangiisinnaatitaanerannik killiliisuussaaq.

Imm. 2-mut

Aalajangersagaq Inatsisartut peqqussutaanni maanna atuuttumi § 10, naggatit pingajuannik ingerlatitseqqiineruvoq. Siunnersuutigineqarpoq aalajangersagaq ingerlateqqinneqassasoq, suliffeqarfinnut imminnut pigisunut atuuttut naapertorlugit, taakku aningaasanik ukiumut naatsorsuuseriffiusumut tullermut nuussisinnaatitaapput. Tassunga atatillugu aningaasat atunngitsuukkat ukiumut naatsorsuuseriffiusumut tullermut nuunneqarsinnaassapput, aningaasaliissutit annertussusaannut sunniuteqanngikkaluartumik.

§ 19-imut

Aalajangersagaq nutaajuvoq siunertaralugulu folkehøjskolit assersuutigalugu ingerlassassaminnik, tapiissutitut tunngaviusunik ingerlassinnginnerisa, Naalakkersuisut nakkutilleereernerup kingorna peqqusinerinik maleruaannginnerisa inatsisitigulluunniit piumasaqaatinik allanik piviusunngortitsinnginnerisa erseqqissumik malittarisassiuunnissaat. Taama pisoqartillugu naammassiinngitsoortoqartillugu pisinnaatitaaffiit atorineqarnissaat pisariaqalersinnaavoq, tapiissutit utertinnerinik, unitsikkallarnerinik atorunnaarsinneqarnerinilluunniit kinguneqarsinnaalluni.

Tapiissutitut utertitsinermi pineqarpoq tapiissutit akuerisaareersut tunniunneqareersullu utertinneqarnissaasa piumasarineqarnerat.

Unitsitsigallarnermi pineqarput, tapiissutit akuerisaareersut sulili tunniunneqanngitsut, unitsikkallarnerqarnerat, folkehøjskolip pineqartup assersuutigalugu peqquneqarsimanerminik aaqqiinnissaata tungaanut.

Tapiissutit atorunnaarsinneranni pineqarput, tapiissutit akuerisaareeraluartut atorunnaarsinnerat, folkehøjskolip assersuutigalugu aningaasaliinissamut piumasaasunik malittarisassanilluunniit allanik unioqquitsinera pissutigalugu. Aalajangersakkami isummerfigineqanngilaq naammassiinngitsoortoqartillugu pisinnaatitsissut sorleq pisuni ataasiakkaani atorveqassanersoq.

Tamatuma kingorna tunngaviatigut Naalakkersuisut namminneq aalajangersinnaavaat pineqartut arlaat toqqarumanerlugu, kisiannili ingerlatsinermi naleqqiussisarnissamut tunngavik ataqqillugu, tamatumalu nassatarissavaa pineqaatissiinissamik toqqaaneq unioqquitsinermut naammaginartumik naapertuuttuusariaqarmat. Aalajangersakkami naggatit aappaata aammattaaq nassatarivaa, unioqquitsineq aamma kinguneqartinneqarsinnaammat, ilinniartitsineq ilinniartitsinermut pilersaarutit imarisaat naapertorlugit pinngippat.

§ 20-mut

Aalajangersagaq Inatsisartut peqqussutaanni maanna atuuttumi § 12-imik ingerlatitseqqiineruvoq, taamaattorli imaalluni ilinniagaqarnersiaqarsinnaaneq, siunnersuutip pisinaatitsilerfiusumik ilinniartitsinissamik aalajangersagaasa nassatarisaannik, aammattaaq ilinniartunut pisinnaatitsilerfiusumik ilinniartitsinermut peqataasunut ilinniagaqarnersinissamullu aalajangersakkat piumasarisaannik piviusunngortitsisunut atuutissammat.

Imm. 1-imut

Aalajangersakkami folkehøjskolernerme ilinnigaqarnersiaqarsinnaanermut tunaartarisassat aalajangersarneqarput. Inatsisartut peqqussutaanni atuuttumi § 12, imm. 1-imi ersereerpoq, ilinniartut nalinginnaasumik peroriartuutaasumik ilinniagaqartut ilinnigaqarnersiaqarsinnaasut, taassuma sivirusussutimigut ilinnigaqarnersiaqarnermut malittarisassani piumasaasut piviusunngortippagit. Kisianni akerlianik aalajangersakkami naggatit aappaanni ersippoq, folkehøjskolernerme atatillugu ilinnigaqarnersiat tassaasinnaanngitsut ilinniarnermi taarsigassarsinerit Nunatta Karsianit aningaasalersorneqartut, pisattat angallanneri imaluunniit aasakkut atuanngiffiup nalaani akiliunneqarluni angalanerit.

Taamaattoq ilinnigaqarnersiat ilaat allat periarfissaajuassapput, soorlu ilinniarnep aallartinnerani, unitsinnerani naammassineranilu imaluunniit ilinniartup qanigisaani peruluttoqartillugu toqusoqartilluguluunniit akiliunneqarluni angalaneq, tak. ilinnigaqarnersiuteqartitsinermi malittarisassat. Aammattaaq erseqqissumik tunngavissinneqarpoq nerisaqarlunilu najugaqarnerup ilinniartuunersianiit ilanngaannissaa. Inatsisinut maanna atuuttunut naleqqiullugu nutaartaasoq tassaavoq ilinnigaqarnersiaqarsinnaaneq siunissami aammattaaq folkehøjskolimiillutik pisinnaatitsilerfiusunik ilinniartunut atuutissammat.

Aaqqissuussinerup aqutarinera pissutsit atuuttut naapertorlugit naatsorsuutigineqarpoq pissasoq Ilinnigaqarnersiaqartitsiviup folkehøjskolillu suleqatigiinnerisigut.

Aammattaq oqaatigineqassaaq, folkehøjskolernernut sapaatip-akunnerinik 13-inik sivikinnerusumik ingerlanneqartunut tapiinissaq periarfissaqassamat, pikkorissarnernut ilinniaqqinnernullu inuutissarsiutinik ilinniartitsineq pillugu inatsisit atuuttut naapertorlugit.

Taama pisoqassappat piumasaavoq, folkehøjskolit inuutissarsiutinik ilinniartitsinermi pikkorissarnernik qitiusumik imaluunniit inuutissarsiutinik ilinniartitsinermi suleqatigalugit aallartitsinissaat. Taama pisoqarpat angalanernut najugaqarnernullu tapiissutit tunniunneqassapput inuutissarsiutinik ilinniartitsinerup iluani pikkorissarnernut tapiissutit pillugit malittarisassat qaqugukkulluunniit atuuttut tungavigalugit, malittarisassallu pineqartut maannakkorpiat tassaapput Inuusutissarsiutinut pikkorissartitsisarnernut tapiissutit pillugit Namminersornerullutik Oqartussat nalunaarutaanni nr. 21-mi, 1. juli 2008-meersumi allaqasut.

Imm. 2-mut

Aalajangersagaq Inatsisartut peqqussutaanni maanna atuuttup § 12, imm. 2-mi imarisaanik uteqqiineruvoq. Aalajangersagaq taamaallaat ilinniartunut nalinginnaasumik peroriartuutaasumik ilinniartitaasunut atuuppoq, taamaammallu aalajangersagaq ilinniartunut pisinnaatitsilerfiusumik ilinniagaqarlutik folkehøjskolertunut atuutinngilaq.

Aalajangersakkap periuttip pineqartup ingerlaannarnissaa anguniarpaa, taamaalillunilu folkehøjskolit ilinniartut sapaatip-akunneranut akiliutissaat inassutigissavaat, taannalu malitsigisaanik KANUKOKA-mut saqqummiunneqassaaq, kingornagullu Naalackersuisut - imaappoq Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup - KANUKOKA-llu akornanni isumaqatigiissutigineqarluni.

Tamatumunnga atatillugu Naalackersuisoqarfik taamaallaat sivisunerusumik folkehøjskolernernut tunngatillugu ilinniartut akiliutissaat pillugit isumaqatigiissuteqarsinnaapput, imaappoq folkehøjskolernerit minnerpaamik sapaatip-akunnerinik 13-inik sivisussusillit pillugit. Naalackersuisoqarfik - ullumikkutulli - sivikinnerusumik folkehøjskolernernut atatillugu pisinnaatitaaffeqanngilaq. Ilutigisaanik kommunit sivikinnerusumik folkehøjskolertunut atatillugu ilinniartup akiliutaata ilaanik akiliinissamat naleqqiullugu pisussaaffeqanngillat.

Imm. 3-mut

Aalajangersagaq Inatsisartut peqqussutaanni maanna atuuttumi § 12, imm. 3-mik ingerlatitseqqiineruvoq.

Periutsit atuuttut naapertorlugit Kultureqarnermut, Ilinniartitaanermut, Ilisimatusarnermut Ilageeqarnermullu Naalackersuisoqarfiup Naalackersuisut sinnerlugit ilinniartut akiliutissaata annertussusissaa pillugu folkehøjskolit inassuteqaataat KANUKOKA-mut saqqummiutissavaa. Aalajangersakkami piumasaavoq Naalackersuisoqarfik KANUKOKA-lu ilinniartut akiligassaata kommunimit akiligassap ilinniartullu nammineq akiligassaata agguannissaat pillugu isumaqatigiissasut.

Soorlu imm. 2-mut oqaaseqaatini eqqaaneqartoq kommunit ilinniartut sivikinnerusumik folkehøjskolernerninni akiliutaasa ilaannik akiliinissamat pisussaaffeqanngillat. Taamaalilluni kommunalbestyrelsit ataasiakkaat nalilissavaat, nalinginnaasumik peroriartuutaasumik sivikinnerusumik folkehøjskolernernut tapiisarniarnerlutik.

§ 21-mut

Aalajangersagaq annerusutigut Inatsisartut peqqussutaanni maanna atuuttumi § 13, imm. 1-imik ingerlatitseqqiineruvoq.

Ulluinnarni imaassaaq Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik tassaasoq nakkutilliinermik isumaginnittoq. Aammattaaq ersippoq Naalakkersuisoqarfiup paasissutissat nakkutilliinermut pisariaqartut piniarsinnaagai. Tamatumani assersuutigalugu pineqarsinnaapput ilinniartitsineq, ilinniartut amerlassusaat, ilinniartitsisut tiimiinik atuineq aamma folkehøjskolip atortui pillugit paasissutissat kiisalu folkehøjskolit aningaasaqarnerat pillugu uppersaasatit.

Paasissutissat pisariaqarsinnaapput tapiissutit aalajangerniarnerannut, taamatullu atorpeqarsinnaallutik pisussaaffinnik sumiginnaasimanermut atatillugu pisinnaatitaaffiit atorpeqarnissaannut atatillugu paasiniaarnermut, imaappoq tapiissutinik unitsitsinerujunnarnernut tapiissutaareersunilluunniit uterteeqqusinerujunnarnernut naleqqiullugit atorpeqarsinnaallutik, tak. siunnersuummi § 19.

Tassunga atatillugu oqaatigineqassaaq paasissutissanik pisariaqartinneqartunik tunniussinnginneq imminermi kinguneqarsinnaammat, tapiissutit utertinneqarnerannik, atorunnaarsinneqarnerannik il.il.

§ 22-mut

Aalajangersagaq Inatsisartut peqqussutaanni atuuttumi § 14-imik - ingerlatiinnarneqartussat siunnersuutigineqartumik - issuaaneruvoq.

Aalajangersakkap Naalakkersuisut pisinnaatippai aningaasaliissutaasut iluanni misiligaalluni ingerlatsiniartoqartillugu siunnersuummi aalajangersakkanik sanioqqutitsinissamut. Aalajangersakkamut tunngaviuvoq kissaatigineqarmat inuiaqatigiit ineriartorneranni pisariaqartitanut naapertuuttumik misiligaalluni ingerlatsinissat pilersinnissaasa periarfissinneqarnissaat.

Tassunga atatillugu oqaatigineqassaaq, aalajangersakkami taamaallaat pineqarmat inatsimmik sanioqqutitsinissamut pisinnaatitsineq, misiligaanerup sunniutaasa erseqqinnerusumik aalajangernissaat imaluunniit pineqartup nalilernissaa siunertaralugu. Tamatumani pineqarsinnaapput ilinniartitsinikkut inerisaanerit aalajangersimasut. Tamanna ilutigisaanik isumaqarpoq, aqqissuussinerit ataavartussatut isigineqartut aalajangersagaq tunngavigalugu aallartinneqarsinnaanngimmata, tamakkumi paarlattuanik Inatsisartunut saqqummiunneqassapput, inatsimmik allannguutissatut siunnersuutit.

§ 23-mut

Ullup atuutilerfissap siunnersuutiginerata saniatigut malittarisassanit maanna atuuttuniit nutaanut siunnersuutip nassatarisaanut ikaarsaariarnermi pissutsit ilaat aalajangersakkami malittarisassiuunneqarput.

Imm. 1-imut

Siunnersuutigineqarpoq siunnersuut atuutilissasoq 1. januar 2011 taamalillunilu Inatsisartut peqqussutaat atuuttoq taarserlugu, taannalu atorunnaarsinneqassasoq. Atuuttuulernissamut

ulluliussamut pissutigineqarpoq kissatigineqarmat folkehøjskolit ingerlatsisinnaanerinut naleqqiullugu killeqartitsinerit atuuttut piaartumik peerneqarnissaat.

Imm. 2-mut

Aalajangersakkami naatsorsuutigineqarpoq maanna folkehøjskoliusut marluk siunnersuutip atuutilerneranut atatillugu akuerisaanissaat, taamaalillunilu folkehøjskolit taakku tamatuma kingorna siunnersuut naapertorlugu akuerisaassasut. Kisianni akuersissut piumasaqaatitalik pineqarpoq, tassami naggatit aappaanni ersippoq folkehøjskolit pineqartut marluk kingusinnerpaamik 1. marts 2011 ileqqoreqqusat nutaat Naalakkersuisunut akuerisassatut nassiutereersimassagaat.

Imm. 3-mut

Aalajangersakkap nassataraa, siulersuisunut ilaasortat Inatsisartut peqqussutaat atuuttoq taannaluunniit naapertorlugu ileqqoreqqusat naapertorlugit toqqarneqarsimasut, piffissaq atuuffitsik naallugu atuussinnaanerat, tamatumalu kingorna siulersuisunut ilaasortanik siunnersuut tunngavigalugu ileqqoreqqusaliat naapertorlugit toqqarneqartunik taarserneqassallutik, tak. imm. 2, naggatit aappaat.

Taamaalilluni akuerisariaqarpoq, piffissap ilaani siulersuisut siunnersuummi § 8, imm. 3-mi piumasaqaataasunik taaneqartunik piviusunngortitsisinnaanngimmata, taamaalillutillu ileqqoreqqusani nutaani toqqaanissamut periutsinik piviusunngortitsinngitsunik.